



宗研四學
所廣

復禮
所草

甲寅
持燿



MG
I227
2
31



題辭

潘彪 勛青

卽景織心飛綺語懸河瀉玉出卮言近同楚賦論千古遠與龍
大雅遺音分正變好風從律見寒暄而今禮失春秋絕一臥滄海看鳳春

馬野 天衢

海內幾人擅長句夫子獨升工部堂律高直造杜諸將稿富早爲人瓣香
吟樓雙穗世所重行篋萬篇山可藏盟徽散帙三過讀使我神遊追盛唐

盧廷棟 子鶴

東南才藪浙東西詩到申公是大師示我袖中新稿讀琅琅珠玉落參差
一家夫婦兩詩人福慧雙修德有隣萬里任收吟料好峨眉山月錦江春

一

A 554106

汪可久

讀罷瑤篇感念生天涯芳草記征程
峩山眉澹修螺黛雙穗藎高駐鳳旌
世變何人求吏治情深有句續詩盟
玳梁燕子羈棲穩一卷同心玉鏡明

童翼 滄青

銅琶鐵板大江東相對行吟夕炤紅
信手拈來皆妙諦隨心所往卽宗風
任將家國興亡事譜入詩譚唱和中
七尺須眉慙我輩詞壇伉儷并稱雄

前 言

雙穗屢春明集、明湖集、同心草、南安小唱、錦江小唱、巴江小唱、先後燬於劫火，蘇臺吟藁，亦燬於由滬來臺之華勝輪中，酒後鐙前，嘗對內子，追溯舊游，回憶觴詠能成章者十有三四，更從各友好處乞回前藁，及在臺微吟，合得古今體詩凡千首，裝帖兩冊，旅臺舊雨，亟請付印，免再散佚，因災梨棗，但志半生行役，登臨山水之前塵，非敢望留傳於後世也，浙東申丙。

雙穗樓吟 上集

浙東申丙鳳蓀

入蜀行

東鯨卷浪虛城郭。太息蒼生委溝壑。輕擲雄關是左謀。漫從碧海求靈藥。
此時滋蔓已難圖。當日操刀慳一斫。春風無奈別離何。白髮龍鍾雙淚落。
台盪騰拏萬嶺雲。磴道空盤五丁鑿。凌晨打槳塔山灣。兩岫插天日色薄。
青田麗水馬前收。紫蟹銀魚盤上錯。重重夜氣出金華。荒荒古渡求藜藿。
梅垞漉酒話江山。天際蒼鷹競拊搏。詰朝舟次弋陽城。父老遮要交進爵。
官舍甘棠已十圍。馳道露營添萬冪。酩酊一覺過豫章。雲霧匡廬窺隱約。
長江天塹猶戒嚴。旅店燈昏數寒柝。晴川閣下雨濛濛。英武洲邊田漠漠。
浹旬飽食武昌魚。繁華無改清平樂。譚禪說鬼異傳聞。水月鏡花難捉摸。

台莊一鼓震天驕。沂水合圍破廣莫。舊知白起果能軍。不道韓盧心早却。
 襄樊又買順風船。鼻鶴移巢驚夜泊。烟波一棹入瞿唐。山水嶽奇氣磅礴。
 攬盡巫雲十二峰。還須鐵索三千橐。白帝城高颺未收。永安宮外桃猶灼。
 奉節不見舊將軍。鞞鼓輒思唐褒鄂。巴山剪燭快論文。越石豪情加於昔。
劉大 櫂槍極目貫中原。韓岳休風邈不作。客中送客盡沾襟。乃裹餽糧登
俯仁 劍閣。錦江花月開心胷。譚士機鋒論干莫。會展盧鴻舊草堂。盧子 此老方
 是穿雲鶴。習聞琴劍滿天涯。更見經綸勤遠略。鄒律無聲馬帳深。馬天衢 風
 雷會許龍門躍。詩文書畫總無倫。秋水茫然對海若。萬里重逢吳梅村。吳
仲漁 十年前共春官幕。進道能齊物我空。中郎有女桑榆託。青霜紫電覆
 併嶼。王治易 文治武功光閃爍。天步無煩西顧憂。國防終賴北門鑰。雲開玉
 壘見青天。一笑憑虛入遼廓。

題陳錫五公假券遺墨

連年烽火滿天愁。萬里來登百尺樓。人與玉泉同皎潔。居當錦水擅風流。
縹緗插架羅經史。充棟圖書集諸子。中有一紙貸金書。海內賢豪叢題識。
松花尺楮寫來禽。古色香凝墨氣深。百兩黃金憑片字。可知信義重朋簪。
乍看不解從頭問。主人侃侃言無隱。先人嘗讀計然書。賦性好施弗小靳。
晚年活計苦顛連。賣盡田園剩一椽。直到此身孤露際。只遺一口水缸穿。
鰥生備受伶仃苦。及身成立已無父。甲子年歸借帖時。往事重溫淚如雨。
兩家墓草已離離。前輩交情不可追。百兩未歸無一語。前塵惟有破缸知。
酬金奉券喜交牽。爲有先人手澤傳。親付裝池花供養。留取寒家史一篇。
我聞斯言長歎息。管鮑分金信難得。只今古道寂無聞。懸之里門足矜式。
傳書隱見有因緣。一帖重歸六十年。事比孟嘗猶足貴。人非季子不能賢。

羨君意氣驚投筆。百戰功勛震疆場。草木咸知萬福名。樹德騫威到蠻貊。
功成一棹息平泉。賦酒歌琴物外天。我亦時叨郇伯黍。人誰不羨范公船。
鯉庭春永翔鸞鳳。文采風流能出衆。清聲高徹白香詞。點染梅花成三弄。
積厚流光信有徵。占爻剝復豈無憑。而今友道消沈久。信筆題成百感興。

遊子

遊子何所住。言住錦江濱。白雲橫戶牖。綠樹過前津。託興在冥莫。哦詩寄
隱淪。瞻天意空豁。憑石數游鱗。我亦知魚樂。卽之如交親。每飯投餘粒。嗟
呷動秋蘋。魚亦解余意。成羣就主人。物自具有性。遠暴而親仁。堪笑披裘
翁。胡爲尙釣綸。

獨步江上寄懷錫九

獨步秋江上。連山橫翠微。明霞行聚散。好鳥逐羣飛。江上多清風。菰蔣日

以肥造物具弘仁。因以療歲饑。海大惟善下。所以萬流歸。苟無利物心。動輒與天違。小受適得意。自是而人非。惟滿日招損。徒傷識者稀。行行逾險峻。處處設深機。深機果何有。獨立只歛歔。

奉懷野老

西蜀多嘉士。儒雅更多聞。我於龍門馬。久抱瓣香熏。天懷何坦蕩。風節絕人羣。守道貧自樂。執卷老彌勤。餘事拂絹素。走筆起氤氳。寫出眞山水。不讓李將軍。張之草堂壁。使我入松雲。我好塗雅筆。墨渾不分。君曾爲點鐵。棄材勞斧斤。常日寄詩筒。惠我何慇懃。會看登高日。携酒讀奇文。非關避菑患。聊以寫塵氛。六年浮錦水。白首最憐君。

動極

動極轉思靜。結茆臨荒溪。野曠豁心目。守道契天倪。繞屋多芳樹。時來好

鳥栖。鳥栖久狎。暱馴熟如家鷄。每聽讀書聲。堂前舞高低。似解讀書樂。引吭向我啼。雖不稱同調。亦足相提撕。長味靜中趣。奚事競輪蹄。

門前

門前臨江路。江水涵頗黎。輕風送穀紋。空翠入雲霓。瑤奇極變化。倏然躍狡狴。禽飛旋獸挺。厥狀筆難題。造物無盡藏。觸目心爲禪。人事何不然。所患無靈犀。君子有真見。不爲外物迷。

鄉居示小鳳幼鳳兩女

鄉居足生涯。飼鷄又養鴨。晨日叫啾啾。晚夜鳴呶呶。呶呶復啾啾。入耳勿嫌聒。惟鷄性較靈。投粒輒先得。鴨性自迂徐。嘴濶能并昨。同量一盤盂。鴨早盆成括。鷄鴨各相容。同栖無詬誶。雖非一族親。比翼足相埒。我觀世上人。宅心何太窄。小不忍而爭。鼠牙進官剖。一字入公門。九牛拔不出。羅織

累芳隣。拙言枉羈押。縲綆自慘淒。有理誰爲達。是故訟終凶。理申家已殺。
何矧事難憑。連阡任宰割。相對泣牛衣。細故成大忒。以視鷄鴨親。能無生
媿色。量大是福根。勉旃慎無忽。

卽事

穠蓼倚寒蘆。紅白色相濟。譬之香山翁。白頭携妙伎。風雨日相侵。同心寧
有異。我觀世俗人。動輒遭遺棄。撮合良非難。仳離一何易。婚姻說自由。匹
配眞兒戲。人道日以漓。誰挽狂瀾旣。

柴門

柴門對水開。來往舳如綫。洄溜向西趨。浹漉濤噴沫。同是一行舟。上下殊
勞逸。順水泛輕舟。駛馬始能及。蓬背榜夫眠。舵樓話唧唧。子女一舟中。熙
熙自樂業。上水若登天。千篙窮費力。百丈負巨絙。寸步踵相接。壯夫累十

八
人。曲躬頭及膝。手足日胼胝。風雨靡休歇。竟日困泥涂。勞勞向誰說。奚勿
事耕耘。重斂無緩急。豐年賦稅完。餘穀供口食。不幸中歲收。供官難準值。
下歲更無論。人畜無寧日。故安水上生。體勞意自適。返棹順水船。鷓首臥
明月。兩岸起白鷗。霜林穿紅葉。去路雖艱辛。歸程樂何極。請看耦耕人。多
少溝中瘠。

寄內

面月起相思。背月獨惆悵。妙曼夫容姿。團欒明月樣。一年容易又中秋。把
酒思君愁更愁。徙倚闌干溫舊夢。月光如雪浸江樓。

次陸儼少青城山勻

一徑入青城。千巖積凌亂。空盤石棧連。壁削秋雲斷。絕壑搖心旌。香風盈
鼻觀。擲筆擅幽深。層陰冥早旦。踏葉出山蹊。青詞霏雲殿。入門香正濃。列

峪花尤爛。中峯不可攀。摩崖裁及半。坐此開心胸。俗塵乃冰炭。回首五年情。勞飛千里翰。一讀喜重遊。再讀興長歎。

答蜀士問台蕩山水

蜀士未見浙山奇。輒爲浙畫動狐疑。我家天台雁蕩間。習見光怪殊過之。更以鰻生劬游屐。時煩羣彥來詢咨。常日不勝報下問。聊爲寫寔託諸詩。智公塔畔流雲石。華頂寺前洗墨池。平視無山天可接。以雲爲景人不知。行出螺溪坐釣艇。奇峯駭石空驅馳。講經台路行逾峻。平泉曲折虛青鏡。連峯插漢各瑰奇。人物鳥獸方列陣。造物似故弄狡獪。雕鑿石骨傷混沌。娑菩到處自開花。羊脂孔翠相烘襯。方廣絕壁一梁橫。高逾千尺寬幾寸。蜿蜒兩峪拱垂虹。巉巖罅茁青苔潤。下趨匹練激石吼。排山撼谷霹靂震。游人至此怖不前。過橋乃入桃源徑。磴道盤空景更奇。劍閣褒斜何足論。

雁蕩尤以雄奇鳴。鐵城卓筆交縱橫。無端著箇聽詩叟。會屈靈運歛吟情。
騷客因之咸裹足。名山無分到公卿。初地閒煞接客僧。山鬼木客門輕盈。
老猴披衣不作語。似憎人語多翻更。嫣然玉女面鏡立。欲取不取洗頭盆。
剪刀峯高雙鏢峙。靈巖頂擁一峯尊。龍湫飛瀑幾千丈。倒注天河寫太清。
廻風卷簾萬珠擲。日光迸作彩霞明。山容一步一換景。千態萬狀窮難名。
道人役猿采石斛。飛牽直上隔山岑。更使爲釀千日酒。無緣能到莫沾唇。
北斗洞深招鶴友。仰看霽濶聚鴻賓。寶樹珍禽世莫識。細繙爾雅象無徵。
游客大抵憚履險。寂寞好山委之神。放翁說來竟不來。眼中止見峩岷春。
東坡會無雁蕩到。胸羅五嶽空嶙峋。勝地咫尺勿能往。總關俗器無仙因。
我常拄杖窮搜尋。撥霧披雲深復深。山靈見怪勿能阻。故作雨雪尼行隄。
偏我遊山喜雨雪。飛泉舞樹逾顏色。絕妙江山雪霽圖。猶有疏楓爛噴血。

一壺清酒漫行吟。有時醉倒碧天側。避地扁舟入蜀中。蕭條書劍與飄蓬。
三年采藥青城住。一筇飽攬峩眉峯。兩處山水擅幽秀。所惜不足當奇雄。
青城坐小一坏土。峩眉竟無三株松。黑龍潭棧仙峯妙。獨慳瀑布挂當空。
連山不斷草樹綠。點景那得霜葉紅。請君試買南遊棹。一領台蕩之雄風。

次王彥夫題雙穗樓圖勻奉答

飛花滿地憶王郎。展讀新詩何縉麗。意境頻開筆陣橫。眼前更覺春光媚。
無限心情寄勝游。盡驅山水入曾樓。稱心不作三刀夢。好景端歸一紙收。
不待河清顧自笑。敢當雅頌人未肖。平生傾倒仲宣詩。而今領略天懷妙。
細味寧徒綴句工。豪情廣漠騁花驄。回首一窺萬騎渺。會心能復幾人同。
讀罷佳章識深意。丈夫奚貴雕蟲伎。要能寶劍定華夷。不在文章邁晉魏。
卽今黎庶難一飽。那得田疇盡双穗。農經物侯本非難。體葆天和殊不易。

連年四海卷鯨波。白髮相看奈爾何。顧我新磨舊日劍。與君同濟遠征艎。
雪消富士春盤馬。風暖箱根日入蘿。高詠將來樓上讀。雲情還較此時多。

寄儼少

行年四十八。泰半走荒亂。人事澹以疏。世情續還斷。落落坐寡聞。栖栖因
止觀。進道懼無期。整衿空待旦。盥誦高人詩。巍然靈光殿。叔世見衣冠。荒
齋頓燦爛。深情不可量。潭水那及半。若夏裹寒玉。入冬方熾炭。開徑啓蓬
扉。披雲無羽翰。拜手輸真誠。臨風致贊歎。

寄懷儼少

春深巴子國。遠憶雲中鶴。修翎尚南山。清唳下碧落。豈是厭煩囂。寧甘腐
草木。會見雪霜姿。來就海天閣。顧我坐冥蒙。因君出迷莫。一笑世情空。相
從入遼廓。

謝渝友相招

白日去悠悠。勞勞何所適。沈雲籠故道。吹霜滿華髮。夢斷浙江潮。心飛峩
山月。菰蔣差療饑。田園任蕪沒。多謝素心人。相招雙鳳闕。

寄意

鼎鼎百年中。浮生垂及半。精力日以疲。大道未夢見。亦有正念生。偶入清
淨界。輒如楊柳花。因風隨飄散。是無禪定功。將安持其變。一息更無常。眼
前奚足戀。及身出迷途。遷延貽後悔。喜得大願船。度我登彼岸。筏喻啓蓬
菲。鐘聲破昏晏。善哉悟後修。始爲不退轉。手操羅盤鍼。指歸心不亂。禪密
信兼修。唯定乃生慧。踏我過來程。返我給孤院。親炙佛前香。舍報三身願。
頓悟無生忍。具足本性存。

中年

中年百病乘。入秋追尤急。其來不可當。銳入而遲出。一月三十朝。太半困床席。初患胃勿良。飽食輒停積。入夜不成眠。胸頭塞塊石。雙手儘摩挲。曲躬頭抵膝。醫言胃液枯。食物忌刺激。唯酒最傷身。因之屏麴孽。所幸日就痊。身安家乃逸。蓋禍不單行。二豎踵相接。酣睡遭寒風。項背起杌隉。四肢難屈伸。木強無著力。舉頭重千鈞。坐起背欲裂。豈其玉山頽。無乃天柱折。家人鎮旁皇。禳禱窮無術。俗有落枕云。毋乃蹈斯轍。人勸試推拿。手到病可釋。老嫗爲按摩。稚子助拳栗。外痛冀內舒。忍受縐眉鼻。肩背現紫青。酸痛益加劇。如添火上油。表裏相煎逼。總關血氣衰。那禁寒復熱。譬諸黃河隄。久年失修葺。殆至汎水期。罅漏乃百出。陡然決隄防。一瀉不可遏。臨時補漏遲。經營須平日。我生何不辰。有清丁未葉。鼎革卅年來。南轅更北轍。垂老亂離中。秋心滿空碧。且惜多病身。來補金甌缺。

病起聽箏篔

病起聽箏篔。金戈鐵騎滿天愁。大鵬鼓翅海倒立。三峽飛濤激怒流。忽似
哀猿啼絕壑。又如嫠婦泣高樓。隣君同爲萬里傷春客。使我聞之腸斷雪
盈頭。人生等是駒過隙。功名成敗一浮漚。伊周孔孟今安在。供人憑弔祇
荒邱。百年泰半叢憂患。及時行樂須自求。到眼有花不解賞。寶山空返人
何尤。請看美色當前光四坐。若言其心勿動果何由。陶分禹寸須珍惜。朱
顏容易變枯骸。差喜古人卓有見漢武。獨具心計老溫柔。信陵功高毀踵
至。婦人醇酒亦優游。功成一棹鷗夷子。載得西施訪十洲。古之帝王卿相
大抵優爲是。余何人焉。豈甘寂寞老敝裘。但愿蛾眉能下土。何須虎額覓
封侯。且當斯世命如草。皇皇儘聽誅竊鉤。堪笑雲羅滿大地。重重密網漏
吞舟。祇有商音慣入愁人耳。那見民間疾苦能挂達官眸。寸縷粒粟輸官

課兒孫啼哭宰耕牛。自來榮辱各有命。汝之坎坷命不猶。筮篋筌篋爾何苦。不鳴歡喜祇鳴憂。世間大有憂如海。況兼強起病初瘳。

幼圻棣贈大紅袍茶索詩

亂離同話巴山雨。剪燭烹茶味逾苦。敝裘瘦馬海棠溪。如許清才歎無主。兩都禾黍正離離。作伴還鄉定幾時。入峽未瞻嚴武節。登樓空賦仲宣詩。我來淪茗浣花水。君亦佐戎駐錦里。春辰秋夕每相過。茶具料量勞伯姊。閱歷滄桑懷抱空。未須得失較鷄蟲。末路不應同阮藉。消愁有癖繼盧同。索屐時亦澆邨釀。江月江花空相向。怪底逢春不惜春。骯髒一身思滌盪。天風吹下武夷江。包裹會曾密密封。紫玉朱英看不足。情深品貴意千重。尺書妙楷從頭認。道是貽君制渴病。合將佳茗換新詩。限日郵傳毋我吝。東風三度錦江春。羃燕頻年倚主人。別後漸教鬢鬢改。天涯難得故鄉親。

尊前炤影愁氏首。細君生恐吟詩瘦。因將筆研鑱芸箱。咄咄書空繞江走。得君新葺整旂槍。文火烹成細細香。入口便能消內熱。一杯大足酒枯腸。昔年出守南安郡。包茆時進安溪茗。鐵觀音品歎無雙。不獨辟蠹亦蠲忿。幔亭仙種大紅袍。道士居奇靳老饕。夢想只今無覓處。得來詩海起波濤。風雷頓覺驅腕底。黃河直寫不能已。何須限日付庚郵。一氣淋漓書滿紙。衿期莫笑老難平。祇是關河未解兵。詩思會如茶味苦。鐙前雨後不勝情。

庚辰元旦寄懷野人東劉大

桃符萬戶擁朱霞。九陌紅塵走鈿車。妙舞獨留巴子國。春風先到野人家。野人避地城東郭。剪取花溪結茆屋。滿腹牢騷不合時。散髮行吟錦江曲。一山一水輒題詩。到處奚囊筆一枝。紅友相將長日醉。白頭不減少年時。草堂佳日常留客。野菜園蔬隨意摘。閨中厨傳舊馳名。長覺芬芳挂齒頰。

野人薄醉意尤真。譚笑風生四坐春。大有微詞抵卿相。自言吾道合清貧。
誰謂野人苦。問亦持籌事坐賈。莫道野人俗。金石詩書藏滿篋。野人雖貧
亦豈貧。終年絲縷章其身。野人似富却非富。搜盡床頭無泉布。野人有道
出羲皇。富貴功名早坐忘。惟果盈盤酒盈盃。天空海濶任低昂。野人有妻
頗靜好。亦知行樂須及早。双飛双宿老彌勤。不嫌鬢鬢亂如草。野人交友
有劉楨。七尺珊瑚贈紫雲。那管歌筵平視謫。流年未息買花心。椒盤攜頌
宜歲首。媵以新詩侑春酒。中原東望陳雲高。生死相恃惟老友。珍重天涯
垂老身。好將一劍淨胡塵。它時握手江南路。我亦芒鞋逐野人。

次勻奉答茂泉先生天津

高秋肥苑馬。玄雲沉朔雁。日日望長空。棲棲腸九轉。一別十五年。徒從夢
裏見。把手話相思。論心酬夙願。同醉玉堂醪。載飽張橋飯。飯後出詩詞。秦

半寄懷戀。詠梅百二章。曉鐘敲斷翰。

我昔

我昔走齊東。公總黃河務。長揖論菱防。因緣斯有故。還許子山才。可以供典簿。其時丁伏汎。櫛沐河之漑。嗟予不成材。羌無萬一補。暴虎方馮河。浹旬復霪雨。浪卷李黃隄。胼胝日搶杜。沿隄萬土牛。作壘摧強虜。庫藏適當空。堵塞窮奚舉。誠感賈讓心。乃爲天所許。八縣集丁漕。初奠河基礎。立水見王尊。衝流牽細柳。斯民免昏墊。那計自辛苦。四月報平成。夾岸競歌匏。環請丙記之。始末乃一吐。會值合龍辰。虞廷見詔舞。

狂瀾

狂瀾旣已挽。河鏡絕塵氛。高唱銅鞮者。無非率土濱。開河到東泗。香火又隨君。春陽麗野景。談笑有嘉賓。大麥層層浪。高吟字字新。移尊就垂柳。一

醉且眠雲。張橋跨泗水。孫院鎖江村。淺草青沾屐。嵐光遠照人。居停敦古道。夜讌羅山珍。鱖魚烹作膾。玉醴漾清樽。解榻香留枕。當窗月滿輪。詩心明徹雪。庭院皎流銀。不盡當年事。繙爲絕妙文。人生重知己。交道貴率真。唯子能知我。清話不嫌頻。豈其有仙骨。相對豁俗塵。願結終身遊。長毋棄苦辛。文章箴得失。詩酒鎮相親。結隣在雲水。意氣一吐伸。更期無暫別。暫別勞夢魂。

載逢

載逢三慶日。東閣宴羣僚。香花充道路。賢俊自相招。其魚嘆微禹。記盛推鄒超。旣進千佛頌。旋泛明湖舠。尊前陳樂部。河上更教曹。宮柳鶯初囀。金隄馬足驕。連山遮戶牖。流水遠煩囂。坐看青雲上。還飛白鶴高。澄清七百里。無羨八州陶。

回首

回首黃金臺。三院一時開。門牆列桃李。棧樸足奇才。江南五色絲。補袞費心裁。良夜三條燭。掄才一放懷。頤和園勝蹟。遊攬總相偕。春興寄吟咏。酒懷正蕩駘。祇慙樗散質。枉費手培栽。

罡風

罡風摧羽翼。辭林歎倉卒。昨爲腹心交。今分南北轍。一面悵無緣。欲言悲結舌。全息趨河梁。征車馳一瞥。此際黯銷魂。此情終不滅。木立忘歸程。心神淒斷絕。恍惚歷三朝。黃姑聞喋血。猶想報非真。圖南心不決。設有沈海冤。終付報土雪。咄咄對山荆。無言同于邑。旋聞慶生還。牢愁爲一豁。繼得海上書。壺中綿歲月。相思不相見。江水長嗚咽。

一鶴

一鶴翔海天。一雁滯八閩。漫漫七千里。尺素逾瓌珍。霜風飛短髮。同感物華新。清淚成連海。詩書自策勳。常及舊時侶。南望尤殷殷。我亦傷搖落。蒼茫向莫雲。

人生

人生止百年。唯詩最傳久。鍼砭寓苦心。鑑戒俾垂守。翼翼喻辛勤。耿耿報高厚。盛世有元音。晚近罕媿偶。孤抱寄遙深。似飫公瑾酒。詞壇海內尊。大筆不脛走。鰈生空就吟。寔愧申公後。師友鈔摩觀。鐘律未覩覩。卽事輒搜尋。寒蟬噤出口。都關學殖疏。促衿因見肘。譬諸宋人田。萋萋雜苗莠。詩意貴和平。律嚴方蕩寇。爲揚敦厚風。累與奸邪鬥。立意不嫌新。取法每惟舊。寧爲戰雪梅。靡作隨風柳。但求取境高。不在修詞繡。古雅贈章八。縛麗鄙元九。俊拔逸清新。罕見今詩有。

題山水

寫意有筆不惜墨。要在無墨處著筆。此畫筆墨兩相忘。豈等懷才求玉尺。
瀆墨濃如漆。蟠枝猶屈鐵。莫嗤垂老性難馴。亦見平生尙氣節。

火牛碕在黔西鎮寧縣南郊三里。高廣紆遠。鐘乳狀鼎彝樓臺。
飛禽走獸。千奇百怪。得未曾有。瀏覽之餘。灑翰寄遠。

火牛碕口水滴滴。火牛碕裏風淅淅。火牛之名胡爲來。此地那有田單跡。
列炬前導魚貫行。地氣鬱蒸火無力。俯不見地仰無天。彷彿人言墮阿鼻。
正幸入碕猶未深。回頭捫壁還可出。忽聞前行空峪音。者番奇妙畫難成。
鐘乳倒垂若飛走。寶蓮斜茁瓣縱橫。此心遂爲好奇動。双屐不覺從之行。
巉巖巨壁遮去路。嚮下一竅無它程。循聲蛇行幾曲折。豁然開朗歷化城。
平原高廣心斯爽。四壁奇突眼爲明。一石挿罅倚釣叟。一石行空奔天馬。

獨柱擎天千百尋。飛泉激石獅子吼。仰瞻不得盡其巔。因之落帽步却後。俯瞰莫能窮其源。下臨無地心顛簸。前路玲瓏石更奇。隱隱鳶飛逐兔走。右折石題小十字。兩峪中分若豆剖。從此步出有芳洲。可以會列千諸侯。撞鐘伐鼓裂金石。元音久寂蛟龍愁。而今昌期應鳳至。戾止青谿白玉樓。玉樓右接大十字。昆邪寶相世無儔。皇冠璀璨慶雲聚。寶藏洞府鎮千秋。左殖元圭右禹鼎。造物似爲大德酬。寂寞只今五百歲。會見萬國拜冕旒。再進更屹一石柱。視前略小世無比。千楞萬縷扣絲絲。貫徹上下靡亂理。其高奚止百由旬。開雕應歎五丁鬼。亟欲移置天台山。倒影吾家硯池水。差勝双岐文筆峯。神物其能萬夫舉。棄之不舍取無方。去留不挾亂心緒。拾級更進五里遙。四廂虞舞奏簫韶。珍奇瑰異看不足。小憩寒流宛轉橋。引人驚囂炬過半。祇此將何支路迢。我於硯中游攬久。約莫猜想亦當宵。

策杖一步一回首。一形一相記之牢。水簾穿出舊來路。疎星三兩月輪高。

植樹適陸儼少贈繪松次勻奉酬

手植庭前松。它年期作棟。風日鎮相憐。憔悴乃與共。初不勝鴉棲。終須爲國用。明曦每當窗。清影還可弄。冰雪礪貞堅。譚言容或中。摩挲朝露晞。柳栗秋霜降。寧事抱甕秦。堪笑握苗宋。天道具乘除。其能免炎凍。人物更新陳。漢南空悲慟。而今雷雨心。猶是槐安夢。鋒骨亦嶙峋。不材慙有衆。孔道不能行。深言記漁仲。枝葉誠後凋。蕭條有餘痛。直筆仰史公。巋然承道統。偃蹇南陽龍。清噦西歧鳳。哲學鄙太立。折象還自訟。風流懷陸郎。遠隔水南巷。感余樹木心。古松輒繪送。素壁起風雲。庭株奚足重。

次龍龕四三初度招飲元勻

客齋設尊酒。共此明月光。主人擅詩畫。展卷何煌煌。南山祝壽杯。舉屬樂

飛觴脫略尙嵇阮。交情媿范張。飲此薄薄酒。入口勝瓊漿。精神洞金石。主客兩相忘。

主人有妙作。三絕畫中詩。夫人逾靜好。不嫌更漏遲。我生媿無學。垂老限藩籬。臨池輒手怯。見獵每心癡。鐙前對大筆。浹洽入心脾。書窗生意滿。不覺花影移。

景光消馬足。天地一戎衣。會見河清日。牽蘿結翠微。如君稱同調。山水倘因依。清話向漁樵。岩居遠是非。閒栽彭澤菊。饑采首山薇。手招猿鶴友。心逐鵝鴻飛。

題韋秘監爲寫雙穗行吟圖

道南濁世洵佳士。三絕才名空餘子。爲寫行吟入素紙。呼之雙穗恰神似。戎服靚汝何旖旎。回頭翠語笑相詵。松蹊策杖行迤邐。移時身在白雲裏。

嵐光絢水拖羅綺。巒頭隱隱結瓊蘂。靈巖倒茁垂玉髓。緣崖一徑平如砥。到此無愁頻脫屣。盤過橫峯開平時。遙岑一笏奇峯起。彷彿佳人憑玉几。霧鬢風鬟差可擬。青眸纖手招彼美。我欲卽之隔雲水。植足忖度忘行李。木立馳神曷能已。微聞不前日移晷。步出溪橋接芳沚。峪口會廛翬雙峙。可是故山雙穗否。茅舍縱橫空兩涘。主人或恐同鄉里。古木蕭森還可倚。昔年曾此陳二簋。索君談笑掌相抵。儘有好風吹過耳。居停頗不貴金紫。卅載遨游虛臚仕。豪情不遏飛鳥箠。攬勝靡遺南北軌。漫吟間亦宮換徵。每勞細君爲正是。双聲疊均無遐邇。野店寒鐙共綉被。隔江萬綠一亭歸。細路披斜窮胡底。我讀斯圖歎觀止。更於題句領妙旨。畫筆斷續寄詩只。詩情濃澹參畫理。故知詩畫兩無比。我輩行吟良有以。八年避地居玉壘。烽火橫穿墟都市。長江不限胡騎駛。蹙國不第吾之耻。敵愾同仇人切齒。

輒將赤手搏封豕。百萬健兒同戰死。元戎廟算空有史。經文緯武擅器使。師徒用命起四鄙。奮向中原掃螻蟻。原子一彈鼻巢毀。偷生祇有投降矣。從此和平心有喜。四民額手還桑梓。道南贈圖尤可紀。東去行吟自此始。

老馬

高原平楚風前立。百戰長馱程不識。瘦骨能無鞞鼓思。創瘢猶擁風雲色。當時馳騁玉關西。砂漬雲沉畫角低。夜踏河冰夷萬幕。緩歸饒唱和長嘶。只今斷岸求荒草。功成勿用將軍老。年時朔雁自去來。欲寄歸心不可道。

金頂曉望雪山

獨上最高峯。披雲觀日出。願種金頂金。長對雪山雪。

題屈文六先生黑龍潭照

澗草縫奇石。天光漏一環。行經飛鳥道。穿過黑龍潭。九折連雲棧。雙崖劈

劍關水簾最深處。跌坐老瞿曇。

大坪

古木上千霄。白雲生脚底。山色有無中。人在畫圖裏。

萬佛頂

千巖萬壑中。蟠空踰鳥道。不覺立身高。祇見衆山小。

東馬一浮先生

爲攬峩眉勝。甯辭蜀道難。千峯都潑黛。長夏尙凝寒。坂峻雲遮徑。山環珠走盤。同遊有班馬。天半吐金丹。

贈劉伯敏

海上一爲別。相逢說廿年。喜君還進道。吾黨有先鞭。放眼今何世。浮查直到天。勉旃劉越石。未許抱雲眠。

次果玲和尚句

衆生猶疾苦。多難此登臨。夢遠江南路。愁爲澤畔吟。一燈傳古佛。曲澗響
瑤琴。明日披雲去。青山深又深。
金頂聲聞遠。峩眉夏日涼。待回人世劫。轉覺菜根香。絕巘臨無地。精藍接
上方。詩筒先我到。舊事感齊梁。

卽事

江國春歸早。山城月上遲。清流搖駿鬣。疏影入罍罍。牛渚懷仙季。雲亭舞
柘枝。老來渾漫與。曳杖立移時。

晚興

向晚殊無事。郊原暝入鷺。樓高星可摘。院敞月爲低。未礙規前路。且當理
舊題。明朝還乘興。載酒手同携。

早興

破曉春江上。烟霞景最奇。水洄隄脚聳。風過柳條知。淺草飛蝴蝶。長林叫畫眉。收來吟料好。一讀我還疑。

送仲高東歸

萬里同爲客。交情無我深。連年浮錦水。復夜憶牙琴。白髮愁還別。長塗涕滿衿。應將他日意。來證此時心。

漫興

曳杖桐陰立。蝸鳴隔樹聲。塵衿炎乍解。吟興水同清。江路還兵阻。荒年止筆耕。臨流看落日。浩氣自縱橫。

敬次茂老元勻兼壽六十

一書馳遠道。五律擅長城。同有今時感。能忘舊日情。雨風愁更亟。詩賦老

尤成。北望空垂涕。蒼茫百念生。
早歲從公去。頻年濟水游。長河方漫溢。獨柱障橫流。榆柳陰馳道。平成速
置郵。會當三慶日。多少簡書投。
喜聽天津住。書城集古歡。龍門資筆法。盧水發詩瀾。獨峙澄懷閣。眞成換
骨丹。高吟入寥廓。神妙到毫端。
猷歲逢周甲。南山合頌姬。祇無傳綵筆。爲寫介眉詩。晚福應無敵。平居乃
一奇。臨風培玉樹。何日鳳來儀。

破戒

寫詩無筆硯。積塊塞心胸。轉恐隄爲隕。還愁路不通。戒詩猶戒酒。同夢欠
同風。一詠蒼茫裡。飄然入太空。

喜值胡漸逵先生

別來經世亂。迢遞阻烽烟。南詔人無迹。西川我自憐。秋風浮字水。冬日見胡銓。共惜繁霜鬢。相思話十年。

哭長姪錫九

竹林觴詠地。都說阿咸賢。經濟才尤富。詩文句可傳。思投定遠筆。早著祖生鞭。不見扶搖去。空吟寶劍篇。

避地居西蜀。長塗喜汝來。白沙春酒熟。玉壘凍雲開。清話連朝夕。寒家有俊才。豈知灌口別。壯志竟成灰。

汝臥裁眉雪。我浮巴水船。得書驚病肺。一夜返西川。旦夕還相視。纏綿已隔年。白頭翻送爾。埋恨錦江邊。

一念吾家世。淒涼感百端。重闈空汝慰。四葉祇丁單。祖德垂今日。書香繼恐難。客中傷玉樹。涕淚對荒寒。

身後安排事。無妨告爾知。尊堂吾手足。衣食我支持。東下歸汝骨。南山倚祖慈。亟生西向念。莫再執猶疑。

預已知時至。未應昧宿根。願汝歸淨土。莫事滯精魂。佛法真無量。人情豈足論。吟成詩六首。老淚忍還吞。

懷袁道沖先生

一別田橫島。重逢十五年。關山還落日。霜雪入秋髯。何處容高臥。招魂到小憐。蓴鱸時正美。同是未歸船。

次塾廬寄懷元勻

同是白頭客。尊前無盡情。益知交道重。轉覺雪山輕。梅格偏宜澹。文瀾不喜平。黯然揮手去。秉燭到三更。

晚歸

牧笛循歸路。江山無盡情。雲峯隨步遠。沙溼落暉明。鴉噪人爭渡。帆迴水有聲。千家暝色裡。燈火粲層城。

早出

疏窗先得曙。披氅出柴關。路碎林禽語。江澄野渡閒。風光盡平楚。春意上衰顏。鎮日隨孤往。雙眸豁遠山。

慰蟄廬

七年吟入蜀。萬里海揚塵。有夢存知己。無花不是春。寄珠頻得女。小鳥怯依人。寄語忘機者。漫嗟吾道貧。

昨是

昨是在山水。今爲出谷鶯。世情重冷暖。宦海豈澄清。醇吏知難作。仙書讀未成。還當解組去。短棹訪蓬瀛。

久覺邯鄲夢。齋心事坐忘。豈期垂暮日。重入少年場。黑髮遺無幾。黃花有
晚香。嶙峋松下立。雲物感蒼茫。

書懷

搔首今何世。胡爲作漫遊。短才靡國用。率性召人尤。善舞多長袖。臨流少
直鉤。何須問漁父。祇合老沙頭。

抵長安口號

航行裁片刻。北上路三千。秦嶺深霏雪。越裳未著棉。綵屢明晚照。白鳥破
炊煙。誰說長安遠。吾今到日邊。

次蟄盧寄珠圖句

安老兼懷幼。多君足性情。澗洄歷寒暑。取致及春晴。別去衣裳短。重逢涕
淚橫。眼前還失照。何處悟無生。

花裡酬高詠。尊前無世情。也知寸草意。直欲挂冠行。家室羈川瀆。烽煙阻海程。去留亡可計。白髮逐年生。遭逢元盛事。聚散或前因。同是無家別。獨憐孤露身。生涯逾寂寞。意氣越清真。濁世應敦品。詩文子不貧。

寄懷王大完賓

一別鴻都府。重逢鬢有星。中年同落莫。大地半羶腥。讀書青雲譜。分題孺子亭。而今徒想象。何處是秦庭。

湘雲

爲解崆峒劍。飄然陽朔行。南轅方盛暑。東鹵正窮兵。迴雁迷溝壑。拋家別死生。衡陽空眺望。不盡故人情。

感懷靜齋

最憶鄒夫子。會同南越遊。八年縈別夢。萬里問孤舟。短鬢行看盡。長沙尙待收。君家四戰地。曷勿計西州。

湘衡遺族

瞿曇經滅度。八口尙浮湘。斷梗知何處。危巢豈是長。可憐埋骨地。正落鑿兵場。孤露寤堪想。臨風欲斷腸。

倚仁忌日

越石騎箕日。而今倏五年。能銷青女恨。空託故人憐。急難誠何說。同根愧象賢。傷心亡可計。但有淚如泉。

綿陽晚渡

招手綿陽渡。臨流垂柳邊。半江斜照日。遠樹澹浮煙。行道多酤客。携尊上畫船。眼前心自廣。坐愛晚霞天。

次 勻

禪悅三善地。繽紛六出花。一枝橫水瘦。破萼引風斜。物性知春近。詩情得酒奢。巡簷還自笑。正熟蜜雲茶。

贈彭椿仙煉師

西風吹野草。斜日下疏林。隔岸牛羊小。禪關花木深。鐘聲停古瀨。鳥語入梵音。寄語燒丹客。冥冥直到今。

送盧子鶴先生還山

高士歸何處。天彭列畫屏。草堂臨大道。苗圃種希苓。欲雨雲遮戶。迎風香滿庭。綠稠秋水寺。紅透蓼花汀。養氣心常泰。安禪影附形。臨流還數步。小坐輒溫經。喜見鵝迎客。閒同鶴養翎。沙洲泥白鷺。皂帽立青蜓。酌月携紅友。飼魚撥綠萍。更誰談媿媿。最是惜惺惺。散髮歸岩壑。怡神入杳冥。料應

詩滿壁。可有酒盈瓶。細字書堪讀。蕭條戶不扃。盤龍資晚眺。流水好誰聽。
枕上風穿竹。簷前雨打鈴。龍蛇翻大陸。烽燧到荒坵。宅柳終思晉。溪桃解
避秦。山陽聞玉笛。劍外歎秋零。欲就君平卜。難招杜宇靈。青門懷舊雨。丹
藥制頽齡。失侶飛龍劍。分金及客星。那知丁未俗。猶見老成刑。惟子眞行
樂。高樓著管寧。眼前生意足。病後酒杯停。可以託高詠。因之發遠馨。我亦
能安命。其如不擊舲。新詩張錦里。舊夢斷西泠。虛室燈無焰。空階月過櫺。
問天空浩渺。歸路隔滄溟。家室傷離亂。風霜起晦暝。中年集哀樂。萬里寄
伶仃。謀國愁無術。多君眼最青。送行棲鶴觀。判袂子雪亭。舉酒敦相屬。今
時厭獨醒。

寄懷雲漢廬

芙蓉江上別。寒暑四番更。劍外還飄泛。神州尙甲兵。溯流棲灌口。攬勝到

天彭。金頂蒲公竈。青城玉女箏。披雲招白鶴。緣澗采黃精。有夢存知己。傾
譚竭至誠。只今傷遠道。應是悔長征。目斷龍場驛。心馳黔水城。絃歌化推
結。作育長莪菁。廣廈羅寒士。高門列俊英。但聽碑在口。方不負平生。乍返
巴山路。旋將池館營。陶園元勝地。江國舊聞名。美奐屏雕飾。新詩慶落成。
蕉窗寫閒筆。雪案詠雙聲。念我離羣感。勞君掃徑迎。西風吹細雨。攬轡入
會城。雲漢樓高聳。郇筒酒共傾。秋宵濫別夢。雅集續詩盟。麗句金同燦。清
詞玉比瑩。蕉花開未盡。楓葉落還生。曲沼渟寒碧。高吟徹上清。漫嗟同鹿
鹿。總是惜惺惺。鴛偶羣儕慕。鵬搏萬里程。夫妻雙博士。伉儷兩先生。玉案
同心集。園花炤眼明。艷情都占盡。老意此難平。

苦雨同內子聯句

山城常致雨。夏至輒衣棉。長路嗟行役。連朝滯客船。鳥呼泥滑滑。車走水

涓涓未免蠶娘歎。寧爲布穀便。萬民悲澤國。二麥忌陰天。樓外空山色。江頭裊雨煙。酒杯聊自遣。詩句向誰聯。隄柳愁難放。江花容易嫣。翠眉擡不起。病鬢更堪憐。地軸寧當盡。天心似已偏。高樓淒思婦。遙夜望歸鞭。擲碎金錢課。翻憎玉漏綿。當時憐短夢。此夕歷長年。遠道書難寄。深閨眼欲穿。一家還劍外。双淚落尊前。此恨家家有。聯吟付管絃。

小園

小園生意足。常日踏青行。流水罅中響。羣山闕處明。風來香欲醉。雨後筍堪羹。飽領閒居樂。悠悠空世情。

次子才元句

幕府才清發。都江記勝遊。吟鞭搖玉墨。擲笛下秦樓。岷水明函夏。崑山雅是秋。壯懷多感慨。欲別更夷由。

長風

長風吹遠角。挾策上征車。地暖無秋意。人偏問菊花。軍門森檠戟。朱旆拂朝霞。徒有登樓賦。因依計已差。

秦越

秦越還相視。郊畿蔓坐滋。操刀須戮力。剪取及秋時。急難鵠原義。同仇袍澤詩。人心知得失。防堵未嫌遲。

絡緯

絡緯牽愁織。楸桐賸幾柯。德衰人共惜。才短墨同磨。天道微茫甚。秋雲變幻多。白頭還作嫁。攬鏡喚奈何。

箕豆

箕豆煎逾急。流民圖忍看。爲叢驅凍爵。超海逐飛鸞。錦篋金還滿。蒼生髓

已乾。築樓摩碧落。高處可勝寒。

庚寅上巳新蘭亭修禊雅集

春三修禊事。舉屬士林杯。勝地因人重。芳蘭待客開。髯公傳筆法。島佛擅詩才。坐對汪波遠。行看景運回。祓除當此日。觴詠集瑤臺。記取山陰道。明年儻再來。

田家樂

樂事在田家。結茆當南畝。一水曲通門。開窗垂細柳。雖曰四體勤。耒耜不離手。物候兼土宜。今年慶大有。三七五減租。餘糧充倉篋。一穫足三稔。三熟家斯阜。鵝鴨戲池中。猪羊圈屋後。食肥雞執耨。烹鮮魚在罾。蜡祭酬天庥。報賽招親友。餽核旋紛陳。舉屬青梅酒。譚笑極天真。猜枚鑿戰拇。直至玉山頽。籠鐙扶醉叟。平居日熙熙。操持有健婦。坦率略世情。心輒如其口。

婚事憑一言。恩愛偕白首。處友以精誠。交道恃以久。畢生無機心。是以仁者壽。爲賦田家樂。得天宜獨厚。

次豐州芙蓉鄉獻双穗麥勻

饑溺殷懷積暮朝。盛傳瑞麥茁雙標。期將悍俗刀牛易。差幸殃民社鼠銷。國步光昌應有朕。天功明顯敢私邀。撫躬深媿多涼德。漫采虛聲入頌謠。

川行口號留別席上諸公

十年有約負峨嵋。今日登程轉自疑。親在未應去國遠。書來猶讓出山遲。明河耿耿家還別。春雨瀟瀟馬不馳。此去披圖求勝蹟。舊藏蜀道圖卷臥游有年一尊相對又何時。

東坡未拜泉唐命。祇解風光愛故鄉。妙曼西湖正搖落。崎區棧道待料量。搓浮碧漢應求侶。驛過藍橋漫乞漿。立馬青城無限意。且舒猿臂射天狼。

無題

斷鴻零雁信無徵。別鵝離鷓感不勝。但有丁嬾開桂府。劇憐趙女織吳綾。
偷情拋眼還當可。密約瞞人總未應。祇爲玉簫恩義重。黯然返棹伴春鐙。
那禁軼事重低徊。手語紅綃枉費猜。軟夢空隨陽朔去。錦帆新報桂林來。
朝雲暮雨行尤密。替月移花落更開。豈謂高唐致神女。徐陵虛負一生才。
花影瑤階見小姑。累郎何事遠將扶。行程豈必爭今昨。著姓無憑說趙於。
北碕同舟原有象。巴山睹面總非誣。并力剪水泯痕迹。細雨高樓叫鷓鴣。
東風作絮舞繽紛。入水穿簾異所聞。羯鼓催花歸曉月。移宮變羽幻烟雲。
空拋鴛偶心千計。能博蛾眉愛一分。玉貌清才徒自苦。天涯惟我最憐君。

書憤

多聞直諒始爲賢。覆雨翻雲亦可憐。豈有巢由定華屋。但存道義勝貂蟬。

平生不解黃金貴。礪節還應白壁堅。太息歸來湖海客。浮名抵死苦相纏。

聞捷

投荒那覓棲鸞樹。此地分明觀鳳樓。敢望浮名傳後世。要吟新句記清遊。
百年憂患今將半。來日星霜漸滿頭。烽火極天家訊邈。王師喜聽下中州。

華巖硯

華巖隱約籠佳氣。老樹磋牙無弱枝。入硯頓消六月暑。沿蹊飽攬萬雲奇。
仙翁羽化留丹竈。石壁紗籠有好詩。只爲炬殘難盡興。重携尊酒定何時。

無題

風來空穴豈無因。烟雨鶯花認未真。男子果能懷坦坦。女兒何致嘴申申。
終關結髮恩情厚。底事牢愁哀怨頻。苦樂兩途君自取。千金一刻洞房春。
滯雨尤雲亦可傷。牽花惹柳又登場。風姨便使翻銀海。月姊能無念北堂。

豈有心期紅線女。儘多人愛繡衣郎。微波欲託終難寄。枉費搓磨九折腸。
坐對眉山一角青。鳴鐘伐鼓夢須醒。紅鸞劫甫悲前路。紫鳳釵還唱後庭。
淚漬青衿猶有恨。盟諧白首恐無靈。浮生苦爲情顛倒。何事天風攪水萍。
江南能有幾人豪。成佛成仙轡自操。過眼無妨金翡翠。逢場何礙紫檀槽。
世情曾是窺千態。鬢影依稀見二毛。從此請君皈極樂。先收意馬放屠刀。

無題

幾生修證到鴛盟。橋上求漿乍問名。碧玉簾攏收遠志。黃金鈿盒注傾城。
隣香初解三分味。小別能忘一種情。詎信煙霞眞誤我。滿腔幽怨不成聲。
凝粧臨夜氣如蘭。角枕橫陳賦合歡。祛病君元三折股。登仙我獲九還丹。
烟嵐縹緲身隨隱。門徑荒涼見亦難。一覺繁華春夢短。挑燈無語淚闌干。
日西初見莫愁堂。帳合芙蓉笛韻長。尤物稱心無價寶。銷魂一度可憐香。

餘溫難舍天侵曉。逸興遄飛夜未央。記取輕雷塘外過。漫驚三十六鴛鴦。
沐恩眞箇判捐骸。日夜心潮幾次來。攬鏡未須傷去艷。傳鐙元是賴深培。
千倉傾盡寧遺恨。一念能迴願化灰。太息彩雲容易散。任人憑弔落花堆。

寄懷馬野老

洞府氤氳歲月深。了無塵俗事相侵。半規戶外凌雲竹。一曲階前流水琴。
入室恍登書畫舫。開編具見聖賢心。張融居處都奇絕。愁煞朋儕何許尋。
去歲籠詩過艸堂。飲醇讀畫最難忘。石渠著錄山同壽。玉璣流香日正長。
傍水居無車馬擾。稱心事見桂蘭芳。伏波世業長桑法。早把金鍼授小郎。

無題

莫寄相思怨望深。江樓日日悵登臨。緘來青鳥翻疑夢。嚼到江蓮總苦心。
攬鏡久虛人似玉。淘沙還見客求金。風前厭聽巴歛曲。難覓成連海上音。

魚龍漫衍競名場。送盡車塵是此鄉。消息罔徵來鳳驛。棲遲空啓輞川莊。王喬虛誕傳飛鳥。月姊荒唐御羽裳。知否江干人獨立。一緘紅淚灑斜陽。紅牙休撥綠腰絃。有客相期正自憐。喜報無憑證上葦。離愁可付篆餘煙。那堪秋水伊人感。況直西風落葉天。翹首銀河元咫尺。玄霜搗盡不成仙。漫將菊酒駐紅顏。遠渚夫容那可攀。隻手空思迴日馭。此身直欲老秋山。溫經倚檻從心欲。野草緣門著意刪。坐臥小園誠自足。何須詩賦動江關。

次劉倚仁兄感秋韵

秋河一度意纏綿。便到相逢已隔年。斯世難求埋恨地。伊人合住散花天。神光歷歷鬢頭渚。別夢依依楚尾船。底事干卿勞悵惘。黃金輕擲李花邊。看朱成碧恨綿綿。轉綠迴黃又一年。憐我無端沈弱水。問君何術補情天。當時悔作抽絲繭。今日眞同不繫船。獨愛傲霜風骨峻。請携尊酒醉籬邊。

秋容蕭瑟意纏綿。傷別傷春恥壯年。行樂肯辭行樂地。有情莫問有情天。
波箋斷送衡陽雁。風信無憑湘漢船。試看博山爐子上。篆餘心字在誰邊。
秋風秋雨鎮纏綿。坐盡秋宵似小年。未易安排桃葉渡。最難熨帖菊花天。
爲君設計應荷錦。解我相思合放船。翹首銀河光燦爛。女星正在少微邊。

西征感事

行雲一片護丹霞。萬里尋詩興未賒。曲港轉篷疑岸走。輕風送槳剪波斜。
愁無靈藥銷兵氣。但有孤心對月華。歌舞漏舟渾不覺。閒情曼唱後庭花。
入楚穿吳百感生。道經兵過轉淒清。傷時痛灑新亭淚。別後能忘故國情。
萬事茫茫歸幻夢。半生落落誤虛名。東風一葉巫山峽。怕聽哀猿腸斷聲。
三年畜艾計非遲。鈞黨紛紛事可知。唇齒攸關敦古訓。豆箕殊命耐深思。
誰言鸞鷲爭殘食。猶笑鷓鴣寄一枝。眉撫西隣無限好。描來終覺不相宜。

行盡山邨又水邨。每當佳處設琴樽。九秋霜露縈清夢。三臘烟花憶白門。
草草短枵收有日。悠悠征雁去無痕。倚紅結綠朦朧過。也算東皇例外恩。
飲啄逢迎亦夙緣。阿誰嘗過酒千年。不辭常日壺中隱。且作酣春洞裏仙。
劍閣雲封吟未到。峩眉雪擁遠堪憐。凡鉛入鼎空陶冶。只是金丹早失傳。
西川東越記遊踪。眼底雲山隔萬重。劫后回頭疑是夢。花前分手又相逢。
思將玉玦還青鳥。便錄丹經訪赤松。顧念寒衣慈母線。淚痕猶是去年濃。
不屑同流合抱殘。牙琴捐後不輕彈。當年誤解登場樂。今日方知處世難。
賣盡癡獸遺老醜。磨平鋒角入清寒。蘭芳桂馥隨時令。寫上屏風只自看。
春回喜見著花枝。天道乘除詎有私。得失固然無足計。是非到底許人知。
澄清玉宇重溫酒。拂拭金甌好賦詩。我較放翁多晚福。錦衣歸及中興時。

草堂寺

人日尋春出西郭。登臨杜曲轉淒涼。浣花溪好居詩聖。垂柳橋邊問草堂。
賸有殘碑存古道。絕無尊酒薦荒莊。鰕生也是傷時客。未到江頭已斷腸。

望江樓

芙蓉花放錦江春。有客登樓哭美人。爾許才情宜薄命。如斯慧業豈無因。
十更節鉞尊天女。一幅松華寫洛神。千載枇杷門巷裏。歌琴賦酒事猶新。

新都宿寶光寺

亂離深味遨遊樂。每到開心發浩歌。名勝地經詞客重。湖山光借美人多。
坪鋪淺草迷蝴蝶。步入叢林禮佛陀。三宿空桑應有意。況教天女伴維摩。

月夜賞桂

故都消息新都夢。不賦興亡話劫灰。寧效魯連蹈海去。還同白傅爲湖來。
朱英夾徑千香簇。碧玉無塵一鑑開。豈待定中聞已够。且迎素月盡餘杯。

流雲一沼碧如油。過客風吹花滿頭。天外飄來香更好。月中探去韻偏幽。亦知冷露無聲滴。豈爲珠簾不捲留。欲狀桂湖難着筆。蘭成貽我釣詩鉤。

子勻送酒至

武侯祠

隆中高臥夢魂安。一出茆廬淚不乾。運轉天機存漢業。浸衰火德敎公難。圖留八陣籌謀遠。局到三分心力殫。伐魏兼吳了何益。出師兩表斗星寒。

迎暉別墅

臨水開軒引遠峯。霞光雲影有無中。好收桐蔭飼花鳳。爲乞春陰護竹龍。酒熟每逢新上月。蓮香時送晚來風。江山雨後眞難寫。一棹漁簑夕照紅。

返灌道中

枕前怕聽杜鵑聲。信宿車回百里程。一抹曉烟橫野店。半規流水出山城。

盤飧誰念農陳力。行旅無傷路不平。堪喚到家還是客。海雲東望若爲情。

無題

同舟襄漢沐容光。不分憐才到楚狂。慧眼拋來求玉杵。會心吟出想雲裳。
牒繙月下鴛鴦字。珮解胷前翡翠璫。後約明年春草綠。安排油壁攬金閭。
過江一棹送雲翹。從此相思暮後朝。密札每煩青鳥寄。癡情羞被塞鴻嘲。
愁生秋水人何遠。開到梅花訊更遙。乍睹玉容驚夢覺。五銖衣薄減纖腰。
騎鳳跨鸞下十州。江南春好賦同遊。惠泉香茗飛蝴蝶。黿渚輕風試紫駟。
泥我暫維花外舫。賺人徙倚柳邊樓。淒清枕上誰家笛。吹徹行雲一夜愁。
當歸兩字滯嬋娟。私咒花前向月圓。慵比春鸞嗟薄命。生愁紫玉易爲烟。
情天缺處羞郎補。恨海平時望眼穿。豈是飛龍眞沒藥。金泥何處續鸞絃。

感事

九府紛紜事可哀。牛車鼠穴亦奇哉。飛泉無路歸秋壑。廣廈連雲借楚材。
月照寒潭終有印。火餘野草不成灰。青蚨去兮來何日。自笑空囊說理財。

漫游

漫遊心計趁江潮。垂柳津邊看放鵬。沽客提壺求野店。閒鷗立水守魚標。
雲開隔樹高樓月。秋入平蕪斷岸簫。纔倚花枝驚露冷。更從何處覓藍橋。

遷客

遷客巴山不自聊。故人門巷草蕭蕭。吟成蕉葉心猶卷。別後桃花意未消。
胡馬嘶殘遼海月。東鯨吹動浙江潮。天涯涕淚音書斷。露布台莊破寂寥。
涓涓不塞終成禍。奕到殘枰見獨能。草木經春隨日長。蛟龍得雨逐雲騰。
徒增馬齒終何補。待畫蛾眉轉自矜。便使中原淪小劫。巴蛇吞象總難勝。

感事

佳麗江山歎陸沈。盧溝曉月渺難尋。亦知朝士清談誤。底怪隣家作計深。
鐵騎三千馳上苑。燕雲十六散秋砧。可憐絕世墻東女。也是難窺宋玉心。
折戟沈沙事可哀。當時戰蹟只荒台。軍前易將都無忌。壁上衝鋒竟莫開。
歇浦不緣魚市失。長江何至敵船來。英雄亦有傷心語。一忽金山全局灰。
龍蟠虎踞石頭城。一夜樓船屋帝京。靈武新軍方血刃。天潢舊旅竟休兵。
飛揚儘有屠沽輩。得失微傷田竇情。積毀唐衢應痛哭。江淮會作不平鳴。
慷慨登臺唱大風。但看被髮九州同。安排沂水鷲魚計。便奏台莊殲敵功。
誰是令名光有史。肯將大業讓羣公。終憐赤手濤難挽。青雀西飛落日紅。
狂飈席卷海南傾。太息蒙龍墮百城。坐甲未聞張蟹陣。飛船早見擁蝦兵。
人羞合浦亡珠玷。天靳將軍一死名。半世奇謀盛帷幄。竟無賓客哭田橫。
奇兵裁解白登圍。三鎮蒼茫又落暉。戰騎直穿青海外。狼星斜出大江西。

舟沈漢水師河濟。火縱長沙事聿非。祇是哀鴻滿溝壑。餐風宿露泣無依。
豪吟懸首國門樞。到底難持七尺軀。博浪飛椎憐報士。晚年喪節惜狂奴。
那思木石填東海。別抱琵琶媚小夫。不待蓋棺今論定。流芳遺臭兩非誣。
誰把黃金買漏卮。小嫌碧玉有微詞。錦江春去烟花老。丹旆魂歸風雨時。
處世應防鄧禹笑。登樓唯益仲宣悲。堪嗟庶政妨諸呂。喜見來收劫後棋。
已到鐘鳴漏盡時。謗書讀罷寸心知。窗前耐校鷄蟲事。江上甘爲鷓蚌持。
詎信蹈危臨虎尾。猶疑作俑自蛾眉。墻頭煞費調停苦。大厦甯辭一木支。
繁華事散水橫流。萬里烽烟黯素秋。待掃欃槍銷劫火。欲回天地入孤舟。
揚旂碧海無窮際。舞劍蓬瀛最上頭。請看魯戈揮落日。先憑秃筆寫羈愁。

倦遊

雨後岷峩分外青。一鞭殘照過新亭。江山搖落悲南渡。雷雨搏扶望北溟。

別去許時花滿院。歸來幾日客盈庭。須眉生恐終孤負。且揜柴扉自醉醒。

無題

夜雨孤燈賦小憐。恨成今日海難填。五銖衣冷羞郎索。萬里秋深悵獨眠。
老去楊枝還作別。迎來桃葉又何年。鏡分脂盞香消歇。一樣恩情感逝川。
竊藥馮虛總可疑。分明貝錦負蛾眉。風欺月蚌遺珠後。雨打梨花結子時。
杯酒弓蛇言有象。蠶金化羽事尤奇。朝雲暮雨愁難遣。腸斷揚州杜牧之。

春日卽事

東風吹綠褪征袍。濯錦江添水一篙。遯世祇應長日醉。踏歌肯讓古人豪。
青尊剩酒澆紅藥。紫燕將雛上碧桃。如許韶光誰會得。及春行樂自吾曹。

病起感悼

病起疏窗每覺遲。瓶鐺擲了又尋詩。心緣靜極翻思動。句到工時轉不奇。

少壯對人多缺略。中年交友漸生疑。劇憐乳燕辭巢去。飛過重闌立亞枝。

題長陵躍馬圖

東鯨卷浪水橫流。積歲相親風雨舟。立馬錦城窺虎略。擁旄華嶽展鴻猷。君方祖述鞭先着。我媿班超筆未投。西望長安增感喟。五陵春好躍驂騑。

感悼劉大倚仁兄

千佛山頭記策勳。大明湖上會星文。我方待罪黃河謁。子甫來參濟水軍。一見傾心成管鮑。同時異姓說機雲。鱣生南朔交如海。才筆風流莫若君。夢醒華胥又一天。重逢歷下更相憐。三年同聽軍門鼓。勝日賡聯翰墨緣。洛水西頭要素伴。勞山絕頂訪飛仙。君言半世無斯樂。大有新詩播管絃。奉使西挈溢浦舟。喜聞建節百花洲。奇謀勝算靡遺策。大纛高轅受獻酋。月夜勞尋詩客舫。花時同醉酒家樓。滕王閣下青雲譜。曾是將軍嚮日游。

赤霞橫穿蜀道昏。累君仗劍入夔門。身經紫塞園千合。坐對清時酒一尊。
秋鴈春鱗通積素。西川南越兩銷魂。旋聞終養東歸去。腸斷霜風黃葉邨。
君於貧主之時遭敲益之痛

盧溝秋雨夜瀟瀟。羽葆紛紛迭費招。前席假籌虛賈傅。後堂侍宴見雲翹。
東風小舸雙蓬鬢。錦水携家萬里橋。到底劉郎多艷福。春情如海復如潮。
家仇國難日相煎。大似春秋隕石年。又見將星落巴蜀。竟教氛祲黯晴川。
延津龍劍終能合。表墓瀧岡且未阡。敬告一言應莞爾。行看殘日就虞淵。
滾滾長江日夜流。慟君無地可埋憂。廿年舊雨多黃土。詩夫子舊陵
虛相繼凋謝一事羸人
祇白頭。忌日邱陵何處哭。澤唐江北
累累未得青雲飄散未歸劉。遭臨青雲
飄泊錦水南陽荆樹猶搖
綠。難得朋簪濟麥舟。

別幾何時驚隔世。君來自沙湖
丙別未淡旬傳聞草草壞長城。一生俠骨拋何處。滿眼傷
心畫不成。未竟功名豈天意。折除福命是才情。首邱有待東歸計。留得餘

年見太平。

挑燈揮淚寄詩篇。往事如雲寫未全。止道光陰等過客。可知今世是何年。能教生死心如一。未必幽明隔著天。多謝英靈常入夢。肯辭夜夜話君邊。

感事

承平簫鼓漢汾河。變作悲笳出塞歌。天下脊梁三晉重。軍前雄鬼九原多。鴈門鳴弩飛鴻絕。鴉谷旋師羽騎過。形勢不殊人事異。堂堂將帥幾廉頗。夷氛未靖海疆危。何止長安似奕棋。東望尙多收燼地。西巡仍是臥薪時。蜀門鳥道迎仙仗。吳市烏衣別路歧。辛苦石城諸將士。雪中猶禮戍樓旂。

消夏

居近江邊意早涼。水風時送百花香。漫脩謎譜求方朔。熟記歌聲定泰娘。雪藕冰桃恣采掇。科頭赤腳任徜徉。有時滿載郵筒酒。一夢桃榔臥月光。

哭張淮南

河朔論心同攬轡。范張交誼久彌新。十年奉使三持節。萬里籌邊獨臥薪。
此日傷神須是我。平生知己更何人。西風黃葉無窮感。題兆歸來淚滿衿。
男兒厚幸生今世。一代艱危挺異才。撥亂始徵醫國手。障瀾端賴濟時材。
九洲風雨機先覘。片語祥和刼便回。功德千章年四十。蒼天茫昧有餘哀。

感懷盧子老

舉足榛荆計力窮。頻年歌哭事還同。重城隔雨君猶遠。平野啼鶉我欲東。
詩酒興隨憂病改。家山路止夢魂通。亦知灞上眞兒戲。願逐盧敖入太空。
孤負公將利器看。可憐羸馬不勝鞍。交游是處都成夢。世事於今止覺難。
滿眼風濤悲激蕩。幾家燈火樂團欒。東歸從使謀能立。待到河清臘已殘。

挽陳凌虛

庾樓月夜遂瞻韓。車笠於今廿載寬。不道傳烽墟故里。竟教埋骨在長安。
營齋有友今時少。仗義如君古道難。三處孀娥衣似雪。招魂西望路漫漫。
避地同居錦水濱。每勞憐惜白頭人。劉琨舞劍飛偏早。陳寔遺書讀尙新。
兩話巴山成永訣。雲橫秦嶺豈前因。過江曾見諸郎雋。泉壤無愁世業漚。

壽于右任先生六三初度

三、二八、

陶園菊徑見詩仙。露冕飄飄尺五髻。早有鴻文傳萬口。更燃犀炬下諸天。
冬心獨抱書連屋。野服平居筆似椽。最憶當年驚坐語。陳伯森八方風雨定
三邊。

世稱陰德必于公。我論遭時又不同。匡復艱逾嘗膽日。姓名早勒黨碑中。
風前醵角催鬚鬢。腕底雲煙起華嵩。萬國梯航書就後。長河流澤徧西東。

賀友弄璋

灼灼榴花耀錦城。華堂初試鳳凰聲。懷投玉燕寧凡品。天賜香嬰是國禎。
數到懸弧三五日。正當皓月十分明。推知貴壽真無極。行看搏扶定太平。

展信告行期往接不至口占

雁訊東來車已脂。燈前計日話相思。新題預寫留雲漢。勝事重贖唱竹枝。
傍水影虛同鵲立。聽冰人窅漸狐疑。愁腸容易催秋鬢。有限青絲耐幾時。

次彥夫勻奉答

雲章披誦晚風前。嵇阮交情豈偶然。試問聲名是何物。可堪荒亂又今年。
東山暫許娛安石。野社方忻致樂天。一笑王師收七澤。未妨盾墨續詩緣。

展萬安草堂讀書兩宿奉意

過江三絕欽遲久。入蜀相思積四年。春滿草堂忘歲月。江環燈火供神仙。
直須下筆論千載。到處圖書共一船。孤負枕中見鴻寶。未能領悟得薪傳。

題雲漢圖步勻

一徑蒼茫路入蓬。烟嵐浮水碧搖空。故應福地塵氛遠。但有詩心宛轉通。
月夜開軒遲野鶴。風濤催詠繞雲松。莫愁白雪人難和。携稿猶來海上翁。

壽方母陳太夫人

海上紅桑晚更滋。觚稜日影最堪思。重來官舍甘棠在。到處人歌將母詩。
積德益徵無量壽。登堂爭拜女宗師。三山未共興亡改。且爲蒼生進一卮。

慙媿

慙媿年光付水流。積薪厝火事堪憂。操刀不割歸誰咎。補袞求皮與虎謀。
兵氣直穿天竺國。鯨波欲卷大洋洲。英雄姑息寧爲德。笑煞黃毛小子侯。
撤盡藩籬固一隄。明明布局已全輸。忍聽海上樓船壞。坐見天空鐵鳥無。
嚮使王師通緬甸。那來東艦到中途。羊亡莫惜牢須補。請把江山子細扶。

美人金屋鎮西方。儀態容華炤萬邦。笙鼓早聞圍繡闥。嬌憨未見出蘭房。
紅墻日斷雙飛翼。瀛海心期一葉航。須是投梭情事錯。也應珠璧報扶桑。
人道難言壑及隣。盟壇信誓夢邪真。慢誇空海權操我。祇恐珊瑚持與人。
久喜老巖當北面。重期仙馭過橫濱。么麼莫恃金湯固。只算鷹揚眼底塵。

卽事

不出紫關又浹旬。秧歌喚起病中身。田塍引水高於路。布穀啼晴不避人。
徙倚楊梯看野馬。坐來磯石數游鱗。而今祇覺歸耕樂。何日披簑理釣綸。

劉大忌日焚詩

盲昧蒼天問不清。痛君自念淚縱橫。便教化鶴歸何許。祇恐成灰恨未平。
風義直凌雲漢上。交情還覺雪山輕。年時東向呼名哭。可得和詩到九京。

題海天漁舍圖

海天空濶意何如。及此藏身好結廬。人事漫從壽裡憶。世情且付眼前疏。
一竿憑坐消長日。四庫隨溫積舊書。心與蜀江東入注。潌洄趨繞丈人居。

秋思王大

別去王郎臥草廬。重城間隔意先疏。巷深桂樹花開未。足下枝梧病可舒。
歸隱欠營三畝秫。當年枉讀五車書。而今蜀道同爲客。籌國謀身計兩虛。

秋意江三

花木沈睡滿院香。橋頭科坐晚來涼。蟲鳴莎底風停吹。雁起蘆叢月對颺。
亭午屐劬周茂叔。清宵曲記杜秋娘。涉江且住緣菰米。較爾勞生計已長。

寄懷王猷唐

南畫第一蕉雪卷。感人無過凝碧詩。右丞大筆參造化。後世諸子空騁馳。
海涵地負夢未見。模山範水貌其皮。獨有獻唐嗣宗法。吟情畫意最欽遲。

醉後寫畫

書畫怡神。審費思。有時興到。偶爲之。臨池著意。偏成拙。拂素無心。每出奇。物我相乘。原是幻。盈虛任運。不須疑。行雲來往。寒潭月。妙在黃庭。初寫時。

端陽寄懷皖兄綬弟

西蜀春遲。甫插秧。驚心四十六。端陽堂堂歲月。更何事。滾滾江波。尙異鄉。世亂弟兄三處隔。路遙書信積年望。料應痛飲雄黃酒。可遣胸中別意長。

答蟄廬贈梅花畫片

十年前事將誰說。一幅寒梅寄素心。願我疏狂還碌碌。見君風骨更森森。尋詩句在花邊得。交友情從別後深。只覺暗香來紙上。蕭齋長對滌煩襟。

秋感東廬老

小院清陰畫掩關。臥聽流水坐看山。蒼松月上棲元鶴。鐵笛風迴靜百蠻。

烽燧極天傷遠客。雲羅滿地漏神姦。望叢陵廟匆匆過。太息髯龍不可攀。

臥病兼旬聞捷霍然

風日清和喚奈何。浹旬除酒臥卷阿。祇愁霜葉紅難待。未補秋山翠一螺。
垂老漸知無病樂。平生翻悔中情多。床頭喜聽西師捷。勝是金鉞起宿痾。
好風傳捷動江城。細字能教老眼明。東寇已成強弩末。北非初見出奇兵。
事當喜極翻疑夢。心到窮時轉覺平。一笑六年糜涕淚。未妨歸去續詩盟。

寄懷杜鑒儂

散髮行吟錦水濱。六年常坐暗香熏。衡門別徑通詩客。法曲元音出細君。
文筆直凌庾開府。才華遠紹杜司勳。六朝造象簪花格。信手拈來總絕羣。
去年邂逅巴山路。今日重逢萬里橋。人事升沈原有數。天涯咫尺不爲遙。
憶蒼室暖花長好。故國尊開恨未銷。五處相思秋滿地。同君落日望歸橈。

青城卜居

平生敢作名山想。居對青城豈偶然。一路林花接梵宇。長年洞府鎖雲烟。
霜鐘敲出燒丹客。羌笛吹來采藥船。三十六峰隨意住。不辭人喚地行仙。
不求聞達息征塵。鏡水屏山寄此身。能到行窩非俗客。得親尊俎定詩人。
門前晴日千遊騎。江上輕風一釣綸。種菜栽花勤抱甕。小園要占四時春。

花朝卽事呈席上諸公

八千里外逢佳會。百尺樓頭拜主人。雲止吉祥飛鳥集。毫揮珠玉誕花辰。
泯峩劬屐春將半。井絡藏身德有隣。自是風流追洛社。未應傷亂廢杯巡。

次蟄廬江樓元句

一篇珠玉唱詩樓。無限風光筆底收。撩我別情傷往事。余與倚仁當登江樓因君妙句
發新愁。行來柳外忘長夏。吟到江頭興早秋。天末故人還幾輩。遠書歸計

兩悠悠。

斜照烘雲欲上樓。眼前景物曷勝收。一尊憑水將誰話。獨寫新詩與客愁。
離亂連年無好語。來牟苦雨不成秋。入夏寒雨
二麥無收憐君同是傷時者。應感江關白日悠。

次彥夫寄陶孟夫句

一個閒鷗野蓼邊。風輕日暖興悠然。寧知湖海揚塵事。不問春秋隕石年。
水瀨足爲投老地。菰蒲得飽任吾天。祇應笠澤稱同調。信與烟波是夙緣。

寫竹寄懷濟安

一徑猗猗萬個陰。凌雲拂露總無心。久欽勁節堪醫俗。又見新枝讓出林。
風格如君宜水石。龍鐘似我感牙琴。而今瓦缶長鳴世。難得柯亭有賞音。

桃園感悼劉大

行到桃園不忍過。傷心人已邈山河。當時座上尊常滿。今日門前爵可羅。半世才名遭鬼妒。一生憂恨爲情多。怪它去後開如許。曾是從君舊折柯。

重過水竹村小梅訴苦感悼

斜日西風水竹村。舊經游處最銷魂。江樓不見鷺鴻影。隄柳猶存繫馬痕。此日簾櫳香寂寞。當年蝴蝶夢溫存。淒清簷角垂髻女。淚眼星星說感恩。

冬日卽事柬子鶴先生

百花漸次謝繁穠。一晌柴關閣短筇。應是徑荒無客到。劇憐裘敝任妻縫。室爲取暖何妨小。墨亦憎寒不肯濃。喜見南枝梅有訊。板橋吟望鶴來蹤。

別錦城卽席奉意

錦水浮家此六年。芒鞋籐杖小神仙。峩眉行采蒲公藥。雪嶺吟搖杜老鞭。三宿桂湖香似海。一春花市夢如烟。最難拋却青城去。要寫江山置酒邊。

行窩來往都詩客。投玉飛珠意氣真。三絕才名推野老。高懷風雅數陳遵。
鳴皋最憶華亭鶴。質廡無慙舉案人。後夜相思隔江水。忍將消息滯鴻鱗。

次鼎丞大使秋感寄懷勻

霏烟片片入長林。落葉蕭蕭萬木森。渡口橫舟孤岸迴。人家斜日半江陰。
天邊雁字縈歸夢。水上蕭聲動客心。短杖飄然暝色裡。山城吹角咽清砧。
又是西風掠鬢斜。那堪短夢憶皇華。盍來揚子耘經地。羞送張騫泛海槎。
玉壘沈雲悲牧笛。沙隄歸馬起胡笳。溯江一舸蘆灘月。迸入秋聲半落花。
江頭曉氣接清暉。日上流霞漸入微。野店半開羣動集。長天一碧隻鴻飛。
行吟遠浦詩彌澹。坐釣明時願豈違。搔首故交遺幾在。丈夫應自致輕肥。
國手難收覆局棋。銅駝玉馬益秋悲。東塵揚海還今日。南渡傷心又此時。
露布新從湘北到。雲車重見甸邊馳。頻年涕淚揮無地。獨立風前不盡思。

鏡前休唱念家山。家在天台雁蕩間。九日琴尊登羽洞。十年消息隔梅關。
楓林江上遮人眼。鏡影霜欺逐客顏。手把南華傍秋水。後身恐復墮清班。
避地長江欲盡頭。可堪扶病又經秋。酒邊難制拋家淚。劍外空懷故國愁。
去住此身同水月。沉浮隨分與沙鷗。勸君且抑蓴鱸思。今日長安是益州。
成敗由人莫逞功。幾經廣武野烟中。淮陰王後安無日。劉季歸來唱大風。
嘉樹蒙霜還褪綠。衰容借酒暫飛紅。汗流送盡興亡事。閒煞沙頭一釣翁。
凌晨策杖入迤迤。坐拂藤蘿倚錦陂。振翮喜看鷹出漢。營巢厭見鵲爭枝。
旋多野老盤豚至。賽罷田神樽酒移。一笑相招同舉屬。來年秋寔更豐垂。

次均奉答茂老兼題梅花百詠

如山往事將何說。奉讀新詩無盡情。一品集成臥林壑。中年才過謝公卿。
陰陰喬木森秋色。滾滾黃流帶頌聲。不有先河遺軌在。而今那得守平成。

倦撐老眼望明時。還欠梅花百首詩。落日金台歸短夢。霏香庾嶺動遐思。祇應劫後三緘口。除是春歸一展眉。獨有不堪回首處。兩都禾黍正離離。

渝瀘舟中

雲峯有約赴輕寒。一路江山取次看。平野人家帆影外。夕陽城郭浪淘殘。宜修陰德培天爵。好把良心過險灘。到處大書船覆事。驚魂額手慶平安。

次均奉答

病人燈火嫁人天。揮手臨流亦可憐。柳岸遠隨帆影轉。巴山還在榜歌前。錦屏隔夢淒三月。仙侶無緣濟一船。呼吸尙通江水綠。客窗香炷坐空禪。

次均

碧漢何從判淺深。修辭我讓馬端臨。疇知佛法西來意。了悟雲山北向心。待濬詩航通積石。未開文網故緘金。柯亭今古猗猗竹。祇有中郎是賞音。

涉世都歸夢一場。白頭人尙滯他鄉。獨張心眼睨秋水。誰把鯤鵬問老莊。
渾俗當前休襤襪。趨時短後著衣裳。平生空具揮戈手。落日蕭蕭感魯陽。
叔世人情月下弦。幾家還唱想夫憐。漫將善謔誇秦贅。浪寫新詩付裊煙。
舉足難求離垢地。椎心欲問有情天。卅年歷盡紅羊劫。只羨鴛鴦不羨仙。
愁將青鏡炤衰顏。金頂靈峯不憚攀。戰火橫穿人蟄洞。詩魔直逼我移山。
大材自古難爲用。小唱無多半待刪。喜見吟塵入雲漢。雙聲高詠破天關。

無題

穠李夭桃轉眼空。金鈴無柰妒花風。三年端爲情煩惱。一事終須諒友朋。
春到高樓原是夢。愁來舊館賸啼紅。文園病起驚鴻遠。江水秋心迸向東。
期內不至感作

流鶯還在谷深深。累我江頭幾度臨。倦鳥歸林應有意。行雲出岫本無心。

長空遠矚瀾天霧。黃葉辭枝滿地金。獨立風前無限感。何時同聽海潮音。
苦雨寄懷內人

久雨庭階長綠苔。旅愁鄉思逼人來。青城虛設遊山屐。遙夜惟銷暖玉杯。
天半濕雲吹不去。窓前紅杏落還開。春闈定費金錢卜。一曲瀟瀟羌笛哀。

江三兄以世亂不應投閒見勗卻寄

孤負江郎筆一支。生涯爲報故人知。春遊山寺題詩句。龜入霜林對酒卮。
白髮肯教佳日去。青燈猶是少年時。謝君莫惜辭官早。正悔抽簪計已遲。

利州夜渡登皇澤寺感賦

縱橫無計置吾身。老大猶傷馬足塵。豈謂好游同曼倩。自來許國幾張巡。
三邊野戍寒吹角。五夜江鐙獨問津。燃火利州摩石刻。登臨未免淚霑巾。

次姚鵬雛均

祕監能詩久費尋。贈袁安句老逾深。故知才氣應天縱。豈謂吾生竟陸沈。
豪興都隨憂患盡。滿頭徒見雪霜侵。不期寒雨巴山路。又聽元黃正始音。

南山

南山在望未經游。春暖移尊江上舟。剪水翻嫌雙槳疾。登峯且待一筇求。
鐘聲聞到尋仙路。樹影圓扶插漢樓。却羨道人酣午睡。結茆我欲向丹邱。

問君

問君底事發高歌。攬鏡其如白髮何。涉世百年還恨短。平生益友不嫌多。
九洲猶有堪游處。汲塚還留待補科。等是欲行爲小住。隨身瓶鉢老頭陀。

中秋製紙

不讓公輪巧奪天。絲絲入扣出心傳。錦纜珠柱隨盤走。銅網金輪共月圓。
朱轂拖氍承玉液。瓊樓接漢瀉飛泉。洛陽貴價從今定。彈指拈來十樣箋。

三皇台九老洞

踏到天門覺路開。五雲深處見樓台。橫穿古洞求丹竈。倒插青峯入酒杯。今日喜同問道去。何時重見散花來。空桑三宿情何限。只是仙翁喚不回。

寄懷茂泉先生天津

浮生贏得是空名。不止溪山負舊盟。一代名家能幾輩。故人高隱隔天京。掬心欲寄書難盡。搔首傷離畫不成。記取來春應煮酒。澄懷同訴廿年情。喜展君書必有詩。天涯惟此慰相思。三珠寶樹春方滿。二月琪花景更奇。曉日課孫書絳帖。晚風懷友寄清詞。黃金臺上如鉤月。不管人間有別離。

寄懷劉丹五

勞君想望惠詩篇。再到行窩又隔年。豪氣未教離亂滅。高懷猶寄水雲邊。身經百戰名方重。吟出無心句早傳。未礙風濤翻大陸。淮南鷄犬亦成仙。

名將從來罕白頭。詩人幾見遂封侯。聞鷄起舞傳家法。緩帶輕裘踏月游。
自有雲翹綿淑景。絕無細事動邊愁。丈夫豈便溫柔老。要把丹心補漏舟。

感懷

海天何日放魚罾。小住山城第幾層。故國臨風雙白鬢。平生知己一青燈。
多君高義偏憐客。到處爲家轉羨僧。花事江南還是舊。連宵歸夢總無憑。

哭馬宗榮

驚傳噩耗文星墜。一代經師此可哀。舊夢縈懷淒馬帳。沉雲壓岫黯龍堆。
空遺論著人爭讀。天靳才名我費猜。最是梁園同作客。飄燈細雨送鄰枚。

感事

枕椰一夢歲華深。如此江山負素心。懷刺真應泯瀾字。無絃空自畜陶琴。
縱情莊子逍遙賦。活計唐風蟋蟀吟。檢點征衫留淚漬。同憐啣木作冤禽。

次蔣山青啼鶻句

西州羈客感啼鶻。六載聞聲祇惘然。眼底煙花空自好。袖中詩卷與誰憐。春秋隕石還今日。江漢垂綸及暮年。見說蔣山青似舊。未妨吸綠拂吟鞭。

奉題春雨樓吟藁

江東詞筆玉河水。脚底峯巒歷幾層。大有雄圖規紫塞。盡收文物裹吳綾。一樓春雨敲詩細。四面雲山繞座凝。會見凱歌同返櫂。秦淮煙水放魚罾。

次雲漢樓送別句

隄柳遙隨別意深。江流無住白雲心。催年急管休懷瑟。獨客牢愁且撫琴。緘寄明珠題密字。拈來紅葉試清吟。冷香一紙蘼蕪怨。似費秋閨七縱禽。

交道

交道沉淪祇可傷。五雲樓閣本荒唐。蠨蛸網戶人何在。蟋蟀悲秋夢早涼。

老去心情猶務得。歸來烽燧正難量。擲還一紙吾誰憾。越絕書成記海棠。

寄內次勻

西風落日鬢成絲。雨過重陽興可知。避地已無人藝菊。登樓未免我尋詩。
還憐蓬梗同漂泛。止把茱萸記歲時。東望海雲行不得。六年歸計總差池。

卽席呈徐大馮五

不辭千里慰相思。爲乞徐陵一首詩。細雨飄知秋未老。青山隱笑我來遲。
霜霏平楚攢紅葉。路擁梯田界綠陂。雁戶新增多易姓。到門審識立移時。
故人門巷草蕭蕭。一見相驚兩鬢凋。十載行吟共流轉。九秋風物寄飄搖。
捫心無與今時補。累塊都於此日消。酒後別情譚不盡。荒鷄叫破可憐宵。

感悼倚兄

長別而今又一春。白頭猶是未歸人。儘教泉壤添雄鬼。最痛中朝失重臣。

功業永垂青史在。交情還有夢魂親。無多老淚連年盡。愁對遺孤宿草新。

題王寄叟竹林行樂圖

一幅新圖寫輞川。祝公七十又三年。調梅事業空陳迹。同榜王侯漸化烟。
歸隱猶餘書滿屋。隨身況有筆如椽。江湖豈是漁翁意。萬樹瑯玕著散仙。

瓶插紅梅

建窯瓶插一枝紅。疎影虛窗趁曉風。絳雪已霏人尙遠。清香初透意先通。
祇愁倩女離魂去。似見冤禽染淚濃。誰是朱顏同耐冷。宜春小苑儷昭容。

卽事

扁舟是處可垂綸。底事臨流羨沒人。平野雲翻高下羽。半江日炤往來鱗。
青山蕭客都含笑。老樹蟠枝別有神。喜極得魚還煮酒。籠燈策杖約鄉隣。

五十年華又立秋。晨光弄影上山樓。曾蠻留得行雲住。曲院環分野水流。
羌笛西風歸牧馬。蘆花斷港靜眠鷗。隔岑隱隱氤氳見。策杖還應載酒游。

君平井

丹井依然人早亡。只今遺澤破天荒。浮生已過波千疊。世事都歸夢一場。
寧效屈平來問卜。喜聞裴子去求漿。寸心祇是隨緣住。坐對清漪夏日涼。

夜起

從來居愛臨江水。早把榮名擲浪層。五夜聞鶡傷蜀道。七年歸夢滯春燈。
入燕還識吹簫客。游食眞成托鉢僧。星斗滿天搖不定。待銷兵氣曲闌憑。

卽境用雲漢樓句

澄潭雲影過無思。作佛休教墮辟支。心鏡空明寧失炤。蓮台香潔定移時。
還同白傅湖中月。差擬王維畫裡詩。獨有性靈長不滅。幾人到此蔽良知。

哭劉安農劉繼先

大什陰符尙待收。傷心人事等浮漚。孝標耀藻文壇迥。越石歸魂曉水秋。笛韻山陽催老淚。詩名春覺在胸頭。從來西蜀沈星地。誰復同拏風雨舟。

懷朱國華君

鷺江久已耳清芬。巴水遨遊得見君。一代高標重司李。中興寶劍乞朱雲。胸羅錦繡人爭道。學貫申韓我所聞。最喜霏來珠玉句。沙頭迴誦倚斜曛。蕭蕭門巷沒蒿萊。每到黃昏唯子來。籠袖出詩同月旦。舉瓶無酒共霞杯。應劉並世心尤契。蠡種匡時志豈灰。早晚收京唱東去。明星如斗耀西臺。

鏡庚勻

共誰攬轡志澄清。刮垢涵光定泰平。成敗不須元夜聽。悲歡無過此中明。招來霽月稱同調。信與春閨別有情。昨日朱顏生白髮。對君愁起鼓鼙聲。

柳

風姿張緒憶當年。青眼低垂大道邊。題字公孫真有象。登樓少婦更相憐。
梢頭月上成虛誕。池畔花飛悵獨眠。空織情絲千萬縷。章台何處繫搖鞭。

次道南勻奉答

東風送綠上山樓。坐擁圖書薄五侯。點染文章臨水面。安排詩畫到峯頭。
石榴一樹紅於火。秫稻新秧碧似油。更有耐人消受處。它鄉猶得住溫柔。

美人鏡 庚勻

笑靨愁蛾畫不成。嬉春臨夜總關情。長門淚漬菱花濕。玉案吟酣柳眼明。
別鵠深閨栽獨活。驚鴻對影定雙清。晚妝殘後還相就。生恐春山熨未平。

次皋齋勻

遠略鴻才嘆勿如。輒將寄字造皋居。意氣縱橫五嶽小。文章條暢九河疏。

歸來歐海而西路。讀盡中華以外書。坐挹光風心自爽。蒼茫高詠溯唐初。

次 勻

煙霞嘯傲葆真如。畫戟辭榮此隱居。午寂高齋臥虛敞。曉風高唱寄蕭疏。抑揚人物春秋筆。鑑戒興亡史氏書。傲歷公卿敦靜趣。青鐙猶是卅年初。

疊 勻 奉 答

輕風晴日意如如。鳥語空庭感索居。文字不隨鬚髮長。詩才漸逐鬢毛疎。閒雲重疊逾神畫。古木騰擎入草書。數步菘菰江畔路。臨流心羨得魚初。

疊 勻 奉 答

妙句霏來錦勿如。吟身端合水雲居。故知浩氣胸中滿。無怪權門足跡疎。別雁函傳大雷岸。懷人詩寫瘦金書。手栽桃李香成海。鄒律無聲月上初。

疊 勻 奉 答

宵來蝶夢問何如。言愛林泉此結居。路入松雲塵俗遠。心耽經史利名疎。
鳳麟繞膝賡高詠。龍雀雙環伴著書。拾翠題紅春正永。玉杯珠柱賦黃初。

六疊元勻奉懷壽翁

完璧題橋謝不如。干戈滿地耻端居。豈無直簡追三史。但有清芬景二疏。
今夜同圓千里月。臨風喜展故交書。曲成祇合巴人聽。愁煞當時王仲初。

七疊勻寄舉齋

文仰相如畫六如。研朱挹露事村居。但看詞賦心應折。能賣江山計未疏。
藝苑東吳留法繪。琴台西蜀有封書。而今先哲流風邈。獨立蒼茫感太初。

八疊勻懷舉齋

名山事業究何如。避地能同水竹居。東海鷹還輪翮健。西州鶴自感翎疏。
繁華過眼春明夢。冷暖中年越絕書。知己老來尤可貴。舉齋梅雪論詩初。

早發秦州

蒙蒙曙色發秦州。古柏双行翠倒流。山鳥與誰爭早起。雪花送客總添愁。空傳劍外詩千卷。狐負江南畫一樓。五十生辰還客裡。舉杯喜見月當頭。

陽明碕

遠望崇祠入翠微。繁英細路澹斜暉。不知碕早還人早。只覺雲飛與鳥飛。子夜良能開絕學。鬼方瘞旅志當歸。卽今富水挑江味。來坐先生舊釣磯。

蜀江

蜀江三月春無價。拂曉携尊上畫船。護岸小桃紅滿樹。遮樓垂柳綠霏煙。驚禽飛濕頻呼侶。投老浮家更可憐。不惜苦吟催短鬢。且將薄酒送流年。

一春

一春心事付江頭。但有青山豁老眸。酒到微醺偏得句。書繙細字總生愁。

清流無住隨心遠。美景當前著意收。不是下游風浪惡。還應乘興放東舟。

次 勻

連宵不斷離人夢。見爾燈前淚眼撐。病起籬邊同菊瘦。吟來江上比梅清。
遠書珍重乘歸客。萬里雲山述過程。秋到洞庭應返棹。與君尊酒詠雙聲。

次前勻

林巒幽絕鎮重樓。文酒西南會勝流。珠壁雙輝漱玉集。風光都付錦箋收。
十年樹木門前盛。四面雲山笛裡秋。住到桃源關福分。豈同塵世有繁愁。

傷楚懷舊

細腰宮裏舞天魔。水調都成敕勒歌。宿鳥號弓悲楚雨。沈魚落日憶湘娥。
佩蘭自昔人安在。撫竹而今淚更多。我過章華還一哭。野煙垂盡洞庭波。

陽朔晚眺

陽朔停橈夕炤殘。蓮峯樓上一憑闌。連山錯落明霞裡。短堞橫拖碧玉寒。
極浦魚譚風斷續。沿江童性習波瀾。石濤小品差堪擬。絕世相稱總未安。

舟次平樂

道署聊爲載酒游。甘泉信宿泛扁舟。青山橫斷朝雲靜。碧樹參差一水流。
倒影菘菰搖野渚。斜陽歌管出重樓。人人空望江南好。念到家山興已秋。

夜泊胡蘆口

維舟已是夜沉沉。漁火橫拖水面金。爲問胡麻愁不見。待酤村酒却無尋。
隣船絮絮江南話。浩劫漫漫楚北心。徙倚蓬窓懷故舊。空扶殘夢過湘陰。

桂平登太平天國紀念堂感賦

崛起英雄豈偶然。雲龍風虎會金田。一呼便下江南郡。百戰難回楚北鞭。
坐誤小康灰遠計。可憐急管送流年。登臨西望空垂涕。落日中原徧野烟。

歸途

踏徧西南百六州。采風常日接名流。奇峯古洞經心過。楚水吳山不見愁。此去喜教珠在握。再來未免雪盈頭。激揚清濁當時事。豈是行吟祇勝游。

寄懷吳權仙重慶

斯世誰當醫國手。凱歌歸去見吳剛。杏林紅過門前路。鍼灸神逾肘後方。一棹烟波携酒榼。三巴景物入詩囊。西山耆舊多新語。知否江樓隔雨望。

次蔣山青鬢書原句

平時書卷重懷珍。亂裏身隨馬足塵。置爾無方求魯壁。隣君終恐厄秦人。相携萬里難爲別。此後它鄉更孰親。我不逢辰同落拓。思量直欲棄儒巾。

次史壽白句

蓬蒿沒經星雙炤。洋溢祥光煦一樓。抱道無倪周柱下。放懷漫與蜀江頭。

人文化育歸洪範。風雨縱橫遍十州。共喜卜隣來往易。舉杯相屬破牢愁。

寄懷壽白先生

吳山浙水鍾靈秀。奕世光黃挺異材。盛德猶傳泰伯里。高風同上子陵臺。
但期後進繩先哲。未必今人遜老萊。我輩忝爲師傅表。故應忠敬勗羣才。
賃廡西山豈爲身。要知用意在芳隣。文章得失心同苦。風月懷思夢最眞。
細路肯辭來往屐。新詩頻寄雪霜鱗。文園病起還屏酒。一笑相逢野屋春。
劉郎才氣同心折。海內風騷此獨尊。胎息渾茫工部法。辭華俊拔舍人魂。
赴書尙冀訛東野。戰火何因返故園。宿草案頭頻展讀。橫窓風雨一燈昏。
平生漂泊干戈際。尙友心情感慨同。書劍空傳瀛海外。姓名早勒黨碑中。
爲開風氣宗陳寔。合有文章繼史通。樹木門前堪作棟。未妨高詠入冥濛。

答段无礙

重城間隔好花時。庭院山高得月遲。干木固應天下士。孝標終爲世人知。
金台落日空陳迹。雪羽投林每擇枝。願擷湘蘭君子佩。暫因風惡瓣雙垂。

次道南寄懷勻

八年蜀水鎮浮家。徒有孤心共月華。老馬未應忘鼓角。春城猶是滯雲車。
交親得路荒尊酒。野舍留賓但點茶。感舊傷時無好語。臨風愧對筆生花。
詩來知起維摩病。携榼行謀酒一巡。嵇阮交情元比德。韋平家世久垂紳。
連山雨過青於染。細柳風梳綠漸勻。好趁此時腰脚健。聯吟南陌醉芳春。

輓羅斯福總統

毒龍攪海十洲煎。端賴元戎制敵先。堊壘橫空眞縮地。璇璣獨運竟回天。
羣生胥拜和平賜。列國都教土地全。四萬萬人同雪涕。傷心莫贖白鷄年。
饑溺關懷豈顧身。爲消戰禍重勞神。白宮宵火防侵國。克里嘔心在恤隣。

自立憲章基永固。卽論理想大無倫。未完世界千秋業。都付聯邦後死人。
設會金山竭苦心。遐荒翹首望甘霖。豈容東寇侵華夏。行見西師下柏林。
兵氣合傾天漢洗。鏡歌待唱大星沉。萬邦巷哭還相慰。繼美聯輝有播音。
桓桓偉烈筆難名。煜煜榮光史莫京。寧止西方戴生佛。已標正義奠同盟。
邦家安樂敦生聚。約法森嚴弭戰爭。我寫哀辭無限感。橫窗風雨際黎明。

東道南秘監

軍中才重紅蓮幕。江上風生白紵衣。和璧馮光人勿識。黃台抱蔓事全非。
還憐親舊同蕭散。一臥荒寒任鳥飛。雨後春花曾不少。天涯倦眼認依稀。

次雲漢樓勻

閱歷滄桑興已灰。癩殘巖壑當春回。愁隨凍蕊遲遲放。老見江流日日催。
喜有騷壇開典雅。寧甘腐草就塵埃。何時重續雲樓夢。笑語華鐙醉酒杯。

黃果瀑布

溪山久耳黔西勝。結伴來看黃果泉。我喜萬流趨一派。誰將巨練挂高天。
飛珠映日凝虹竦。噴雪因風裊雨烟。坐對朗吟仙李句。也應驚醒老龍眠。

送客

送客江頭曉望迷。交親祖道各分題。人當垂老難爲別。鳥解傷神不肯啼。
柳色斜遮沙口渡。車聲直過海棠溪。勸君且自扶搖去。莫爲離愁在水西。

題寶蓮洞壁

曾巒叢樹綠霏烟。中有澄泓龍眼泉。菡萏倒垂千瓣露。氤氳斜透一重天。
炬搜寒碧深無底。石削飛潛記未全。太息名山長寂寞。竟教洞府委神仙。

次寄廬韻悼淑君夫人

上界司香合假君。人間誰復事平紛。玉簫再世恩逾重。金蛻歸魂意十分。

猶有啼痕凝素袂。還期夢寐致紅裙。情天缺處爲郎補。莫誤巫山一段雲。
玉璫緘札寄迢迢。儻見飛仙麗絳霄。六幅屏開迴慧眼。五銖衣薄減纖腰。
繡將朶殿靈芸曲。倩譜綠山子敬蕭。話到曼陀最深處。無端淚灑浙江潮。
神光離合認微茫。倩影翻從隔漢望。但贈金丹爲換骨。不愁潘鬢點繁霜。
香飄桂蕊中秋月。夢坐蓮花七寶塘。天上百年纔一瞬。塵寰何事怨宵長。
璇閨紫玉渺於煙。舊夢荼蘼夕照邊。纖爪姝歸貝葉地。斷腸人滯雨花天。
祇將薄酒澆離恨。合賦新詩證後緣。孰慰王郎憔悴甚。五更無睡坐空禪。

次韋道南秋感勻奉和

美人消息斷知聞。鏡卜花徵意孔殷。漢水會心初解珮。蔣山何日可題裙。
衾寒別夢添多少。帶緩纖腰減幾分。絡緯秋庭空織恨。當歸欲寄隔淵雲。
功名心重別離輕。贏得孤燈百感生。不信溫馨縈夢寐。可憐榮祿蔽聰明。

紅鸞度。翅簫能合。青鳥無書。筆枉耕。競說棲霞霜葉好。臨流徒羨得魚情。
西風字水侍清遊。艷說西山似虎邱。翡翠簾櫳歆合璧。鴛鴦池館賦同仇。
偏教囊水舟先放。端爲傳家筆未投。白露橫江天一角。星河耿耿獨悲秋。
大江東去織牙樯。未必歸期總渺茫。韋曲空添詩百帙。于飛也費計千章。
標梅時節應憐子。別院笙歌羨泰孃。寄語蛾眉開蔣徑。合懽却扇詠清涼。

次臬齋東勻

沈心山水正相同。若論文章拜下風。可有謀身如我拙。但除縱酒讓人雄。
窮通豈必嗟礪叟。得失何須問塞翁。滾滾江流催日夜。八年夢繞海門東。

壽內五十

連山送綠試春衣。鏡裡頻年笑鬢稀。胡鹵喜聞驅漠北。水桃初見熟池西。
金容滿月眞難老。斑管簪花妙入微。似子温恭備四德。寧同伯玉說知非。

携手溪山作漫遊。燕雲南日任虛舟。花前稱祝剛三月。劍外艱難歷八秋。勤儉持家兼僕役。親朋徵詠送詩愁。乞君妙句爲君壽。舉案寧辭到白頭。

晚興

不是花邊是酒邊。老來情緒更纏綿。餘醒滿引還邀月。既謝猶開總任天。舊曲新翻千里外。重階再歷十年前。少微星見秋河麗。喜共張融濟一船。

諸葛井

閒雲出岫作甘霖。魚水從知依倚深。鑿井豈徒資萬竈。得君抵死鑑臣心。中原北定神機遠。赤壁東風劫火沉。相業難追惟此在。供人憑弔到而今。

薛濤井

芙蓉城外錦江邊。井貯寒泉尙宛然。玉虎絲牽香細細。銅龍漏滴月娟娟。點來萍葉徵才命。寫出松花結墨緣。無限閨情傳妙句。屏風十二色猶鮮。

無題

總是罍愚隔一重。春鐙妙論衍王通。但窺倩影芙蓉幔。想見神光翠翡權。愁態休教中婦覺。別情應爲箇人濃。分明對座天涯遠。腸斷風迴報曉鐘。

疊均送行

一笛風來古渡津。落梅時節亂離身。江南遣老還思漢。河北諸侯早納秦。芍藥贈歸阿閣冷。芷蘭佩失洞庭春。同舟亦有雲幃感。隔座裁詩寄箇人。

寄懷王大完賓

王粲依劉計已非。東風虛度省郎幃。辭巢春燕憐無主。鍛羽秋鴻悵獨飛。社散猶思堂樹好。羣空徒羨稻梁肥。夕陽躑躅新津渡。萍水交情未忍違。

乙酉端陽

光華景運際天中。一片歡聲萬國同。西北樓臺開日月。東南賓主會雲龍。

榴花饋面心先醉。蒲酒澆詩句自工。早晚收京賡後約。秦淮觴詠待羣公。

新晴晚興

新晴拄杖草堂前。江樹排雲接晚天。列陣爭鳴高下雁。踏歌喜聽往來船。
芒鞋能制香泥滑。繹路多爲長水遷。一個沙鷗閒似我。不辭蕭瑟過中年。

思親示鳳女

双親遠道縈心外。小鳳孤飛最可憐。負米如吾虛隔歲。編箱待女到何年。
三更燈火須陳力。滿架圖書莫浪傳。早晚王師收冀北。會看聚順畫堂前。

書懷

早年厭聽軍門鼓。今日重披趙武衣。馬老豈無千里趣。桐枯終覺五音非。
平生遭際憐顏駟。南渡君臣失岳飛。到底讀書成甚用。雲臺瞻望故交稀。

前題得魚勻

雲龍池館集簪裾。斜照輕風拂露瓊。舉屬酒尊酬五日。分題詩句弔三閩。臨流結綺歌同樂。隔坐飛花興有餘。山鳥一聲素月上。烹茶重話夜牕虛。

次壽老寄懷勻

生當叔世老唯兵。榛棘橫途恨未平。忍聽隣家蜚玉笛。劇憐洪水淹金城。文章莫濟行厨冷。車笠猶敦舊日盟。但看孕珠川自麗。最難邁德致修名。

公園

逗人情思小橋東。軟草如茵眼界空。澹蕩風搖楊柳綠。蔚藍天襯杏花紅。雲臺迢遞千山遠。月殿蒼茫一水通。直到酒酣行不得。最難分手夕陽中。

怪底

怪底逢春不惜春。年年花事委車塵。重來燕子初窺主。老去楊枝怯倚人。塔院雲多遮古道。海槎風惡滯仙津。沙頭大有垂綸地。何必持竿坐渭濱。

遊驪山

陽回葭管氣回春。列峪丹楓最有神。霜落草枯樵客少。雲開石罅野花新。行吟絕巘難偕友。坐愛空嵐欲乞身。寫寄長康徵畫稿。滿山紅葉一詩人。

卽事

玉尺高標御苑開。趨蹌沈宋各仙才。不容迦葉稱尊佛。祇讓梅花獨占魁。細路應教飛騎去。香車應帶好詩來。雲樓笑語春如海。祇待伊人共舉杯。

香奩次勻

曉夢驚迴枕上鐘。餘溫難戀興逾濃。橫添心事羞郎索。亂疊衣衾對鏡籠。記取桐陰彫善吠。莫忘柳外路還通。黃昏但看梢頭月。阿閣湘簾覆幾重。

志痛

林籟蕭疏夜氣清。山樓無睡坐黎明。露偏西牖衣裳濕。心逐東流涕淚橫。

報國昔曾聞母教。洗兵今已見河傾。十分圓滿中秋月。代謝升沈味飽更。

哭母疊均

歷劫初窺河水清。鱣生有母隔泉明。慈懷口授烏棲曲。巴夔心隨雁字橫。欲報深恩天罔極。既枯雙眼淚還傾。八年霜露閭空倚。落月山城報曉更。

哭蔡谷景

驚聞噩耗淚潛然。感爾相從十五年。立馬霜林淮海月。量沙花市信江船。療人病有囊中藥。寫我真能畫裏傳。太息公明竟無命。鷺洲細雨葬寒烟。籌筆豪情賦壯游。尋花載酒廣陵舟。踏平越嶺千峯雪。寫出長江萬里秋。每飯能忘郇伯饌。卅年未改晏公裘。如君荷鍤埋元可。留一鐙傳有小侯。

詠事

風雨層樓聽五更。愁人無睡坐黎明。枯條簾外初迴綠。生意心頭定泰平。

碁局翻教爭劫子。天涯寒盡未休兵。金環唱斷春闈夢。孤負鴛鴦百種情。
殿角風條盡向西。春來春去鳥空啼。天魔舞罷羅衣濕。神女魂銷繡幕低。
雲鬢有花簪謝豹。玉璫亡藥贖唐鷄。可憐一代調羹手。苦李寒桃映滿蹊。
深淺侍郎慧眼青。濃粧宜醉澹宜醒。因知憎愛成吳越。鎮說恩情判尹邢。
花外驟逢背面去。柳邊密語怕人聽。無端百舌東風裡。罵煞河房妒婦星。
鐙黯長門鎖阿嬌。空幃無睡望星輶。三更香燼銅龍冷。別院春多玉笛飄。
止隔紅牆天樣遠。能聞綺語路非遙。微波欲託渾無緒。畫徧闌干坐寂寥。
自沐殊恩繡被春。畫中供奉掌中身。迴波索笑花無色。引酒生嗔玉有神。
遂使世間生女重。要知殿腳尙衣親。鏡奩脂盞尋常事。不信都爲海外珍。
蛾眉見嫉豈前嫌。滯雨尤雲未解嚴。啼笑都非心獨苦。親疏分判語何尖。
從知薄命成捐扇。豈意郎心總愛縑。底事吐絲今自縛。黃金揮盡不開黏。

寒盡春江看弄潮。美人歌舞木蘭桡。繁愁不入銷金帳。本事還霏暖玉簫。
剪水波迴眸灑灑。串珠喉嚙曲瀟瀟。莫須更有雲屏恨。對影聞聲福够消。
琳宮歌管日紛紛。飛走都來倚畫裙。通臂猿能銜白璧。修翎鶴易上青雲。
絳霄清唳依稀聽。巫峽哀啼斷續聞。忍見集靈臺畔路。乘軒冠蓋有諸君。
蝶衣褪粉惜流光。獨抱青琴掩畫堂。臨欲睡時還對鏡。悄無人處更添香。
相思獨活同心苦。倩影孤燈坐夜長。祇恨有情終不達。當歸兩字費周章。
仙容替月比花嬌。雲鬢迎風彈步搖。香澤乍親渾欲醉。蘭闥小別便無聊。
當時柳岸馱驃馬。何日桃源泛畫橈。一種心情拋不得。美人消息隔藍橋。
衆仙同日會雲樓。各把瓊釵當酒籌。鳳管擲來金鬢豔。鸞笙吹出玉雕搜。
休曠隔坐青蛾怨。記取迴風紅雪謳。醉倒東方老曼倩。浪調梅福笑樊劉。
漏盡銅龍萬響停。移時別去女郎星。神光離合秋河燦。鬢影飄搖天漢青。

綽約還輸秦弄玉。娉婷能忘薛靈芸。綺筵散後遺香在。長使孤心動窅冥。
春晴眼底萬花明。萬字欄扶一鑑清。燕語東風原是夢。桃夭碧水豈無情。
黃昏倘踐廂西約。生死能寒石上盟。豈必枕流方洗耳。千家柳岸亂啼鶯。
倚紅結綠鎖纏綿。倩影瓊樓落照邊。儘有三花齊蓋頂。不空五蘊枉參禪。
人嗟夢斷荼蘼路。風遞香開子午蓮。耿耿星河眠不得。擁衾迴味想夫憐。
數盡鷄籌百不聊。試緘紅淚遠相招。梨花院鎖愁難放。蓮子房空粉易消。
目斷征鴻阻秋水。心隨逐鹿激洪潮。芳蘭紉佩非傷雅。祇是無人解楚騷。
作繭難求續命絲。却因簾下燕歸遲。三千弱水誰能渡。十二屏山我所思。
春意都隨流水去。閨情惟有落花知。勸君休作翻風絮。入幙沾泥總是癡。
愁多轉恐骨隨銷。祇是郎心作絮飄。共命鴛盟猶在耳。並頭鸞帶尙圍腰。
空隣南國生紅豆。誰乞東風展綠蕉。到底履冰人誤我。且抽慧劍斬情苗。

滿園花木已成陰。同倚東風各有心。爭長故應偏袒薜。離羣何意更投林。
湘簾靜覺紅芳襲。繡被春承露澤深。可惜夢醒珠玉碎。琵琶聲咽夜沉沉。
巴箋緘恨一重重。欲託微波意莫通。密約倩誰繙手語。寒宵獨自倚熏籠。
慵開粧鏡驚龐瘦。怕着征衫漬淚濃。舊事溫馨成薄倖。小樓敲盡五更鐘。
從來恩怨總分明。底事鐙前絮不清。蕉鹿夢迷應有恨。水雲風攪本無情。
豈疑司馬偏新眷。浪說牽牛負舊盟。白首相知猶按劍。竟教蜚語誤流鶯。
尤雲疑雨儘無聊。月印澄潭不可招。綺語調人原小過。罡風掃葉竟全消。
未經滄海休言水。便到錢塘莫弄潮。我自圍碁君結網。漫拈左史入離騷。
居心作繭致纏綿。道是雲邊是水邊。爲寄聲詩消午寂。竟逾色戒墮情禪。
零丁孀獨悲青女。清淺蓬萊湧赤蓮。飛渡只今成大錯。積非爲是最堪憐。
謗書讀罷鬢成絲。江國雲沈月上遲。含血噴人肆刀俎。雌黃信口費猜思。

情場已悟人天界。心迹終教我佛知。從此臥嘗恢大業。莫存邀倖墮瞋癡。

無題

華鬢天雨曼陀羅。證到情禪出愛河。隔漢星辰歡會少。臨春仙子別離多。
懺除綺障消塵劫。甲剪沈香禮佛伽。第一屬君持忍辱。好須相慰病維摩。

前勻

軍門來往賦同車。見說連朝訪賞書。越客手中空有網。鮫人淚下可成珠。
問君蝶夢添多少。近代鴻才謝勿如。最愛左家賢小妹。一枝詩筆振江湖。

題雙紅樓詩集

眼明英武雙紅集。吐語如環衆妙該。立意遠從華頂上。處心細入藕絲來。
舊傳甲第多通德。喜見鄉邦挺異才。允信詩詞關世運。橫窗風雨一時開。

秋感

秋入臺澎坐夕暉。江山寥落意多違。黎元西北猶艱食。烽燧東南未解圍。豈是今時無李郭。老撐倦眼望皋夔。積年耆舊銷沉甚。繳羽蒼鷹禁不飛。

次龍盦兄寄懷句

十年龍戰恨離羣。萬里鷺洲隔暮雲。閩水多情猶棄我。川山如畫最思君。江南秋老鱸堪味。河北風高荻正紛。當此時艱重把臂。聞鼙儻憶故將軍。

壽鍾槐邨先生七十

德門奕世挺高賢。桂榜花開政妙年。異國都知詩品重。建安猶見法書傳。久持議席存弘濟。老向名山結勝緣。到古稀齡腰脚健。六時坐攝密中禪。

二

民生農本著鴻文。霽月光風祇憶君。心運璇璣收亂局。眼看鸞鷲上青雲。方壺浮海塵難入。四季煦春花自芬。斜照采霞明萬里。八方朝供氣網氤。

將去花蓮留別同人

花港東游共講堂。繁英細路話能忘。秋雲幻覺人情厚。山鳥暗知客路長。坐領天風祛俗慮。行將海水潤詩腸。明朝又作無家別。後夜相思各異鄉。

讀陸儼少畫

曉日東風臨畫苑。一山一水見淵襟。中華六法蕭條久。三百年來此賞心。

寫秋山雨霽圖試建國第一紙

蟬翼蛟綃未足方。精瑩細膩白於霜。正當雨後秋山麗。試寫澄心第一張。西冒發墟常獲古器。掘一尊壘猶未漫漶。歎識紹聖三年冬吉造。底遺積物如紅糖者。土人嘗之。醉死數日。充屋酒香。知爲麴母。劉君剛甫聞之心動。設法致之。沖以村釀。香冽醇茂。惜之如金。以余同嗜。開軒招飲。連浮大白。玉山頽矣。余以萬里之身。得嘗千歲之酒。瀛州主婦。治饌絕精。時節因

緣。適逢其會。歎爲希有。王君石屏。張君仲琅。陳君元暢。索詩紀盛。卽呈四絕。用志嘉會云爾。

宋朝姿態傳千古。今見尊疊識宋朝。多謝青娥貽玉液。美人情意一何遙。酒與劉家本夙緣。寒花土蝕臥荒烟。龍津劍氣終難隱。爲付蓬瀛絕頂仙。醇醪千載發幽光。萬里人來喜共嘗。若向史家求比例。堯蔥舜韭禹餘糧。汴京霸業了無痕。卽此千秋碩果存。我亦傷心南渡歲。聞香入口已銷魂。

題石宗素桃江送別圖

來是無言去絕踪。一湖荇藻倚東風。人間那識仙家事。浪說桃花別後紅。

題山水

粵秀山盤夕炤幽。舊游回首不勝愁。知君同有流離感。寫付高齋作臥遊。

青城初地

雙岫插層雲。四山入天小。人在畫圖中。枕流聽啼鳥。

朝陽道上

細路隨峯轉。嵐光變幻奇。風號萬壑響。山雨欲來時。

訪甯橋

山冷無人迹。懸崖萬丈深。訪甯去何許。雲外只孤吟。

上清門前

倚石聽濤聲。山花澗畔生。門前碁一局。烟外大江橫。

看神燈後還天師洞

爲看神燈坐上清。神燈送我下山行。盤旋細路三千級。步步相隨却有情。

夜雨抵赤城

黃昏行盡登天路。喜聽鐘聲入耳來。古木千霄千萬樹。不知何處有門開。

仙棕

仙棕獨秀茁雙歧。百尺中分連理枝。畢竟世間無此種。故應方士乞瑤池。

朝陽洞

上方樓殿列崔巍。山勢盤陀仄徑開。行過斷崖疑路盡。橫空飛出一山來。

評山

台盪雄奇此地幽。嵐光黛色略相侔。螺溪釣艇籠湫瀑。要比青城勝一籌。

觀心閣

雲樹鬱森森。天風送妙音。本來無所住。何處去觀心。

洪椿坪

栽培當日費精神。護惜風霜到采薪。歲月八千壽世果。可隣不見灌園人。

扁擔巖

撥霧披雲上碧霄。江山搖落意難消。持危須仗肩頭穩。更有誰來一擔挑。

半天坡

載酒去尋仙。行吟到半天。千山自環抱。挂杖聽飛泉。

接引殿

接引出迷津。勉哉未死身。王侯與螻蟻。同是一微塵。

天門石

直上雲深處。天門石一彎。而今登絕頂。此外更無山。

冒雨游山

故滯行程待雨游。飛泉舞樹翠交流。潤餘淺草香泥滑。要使籃輿步步留。

題劉大藏畫虎立幅

寫到春愁虎亦癡。看殘風月不療飢。當關安得如君在。堪笑時人盡相皮。

題馮仰山玉芝圖

佛說樟梨如是聞。台山盤鬱長靈根。千年露植無人見。併與蒼生只付君。

題山水贈黃文叔先生

冬心端愛水雲居。結屋巴江字放廬。坐聽松濤行攬勝。汪波千頃問何如。

題絮閣曲譜

才華福命本相妨。總是恩情太邈茫。誰任楊花狂至此。最無聊賴作君王。

題霍小玉曲譜

紅透雙渦綠滿鬟。坐餐秀色不知還。鞦韆尖蹴碎花間路。看遍江南雨後山。
溫馨膩語鞦韆雲。月下花邊記往還。指點琴臺垂柳外。望仙樓上接巫山。
傷春傷別亂風鬟。不放簾櫳待燕還。祇怪紅閨疏作計。頻年空上望夫山。
同衾無復舊螺鬟。不望黃衫一騎還。早織夢鞋緣分盡。悔教誓海又盟山。

奉懷殷鑄夫

我於濯錦江頭住。君亦成都問卜來。台宕不知家在否。滿天烽燧有同哀。
家山萬里不勝情。欲傾天河爲洗兵。慙媿東風謝桃李。白頭猶自作流民。
源頭自覺不容刀。流出瞿門已奔濤。著意要乘風浪去。垂綸東海釣金鰲。
珍重天涯別後身。從來三戶亦亡秦。多君自有千秋業。萬仞宮牆著箇人。

君卜殷文廟前

題中央軍校十五周年紀念

千捶百練成干莫。十五年來作育多。砥定玄黃又今日。待迴天地入洪爐。

題聽秋聲館詩草

東風駘宕好花時。把卷移尊話每遲。別後消愁更何物。聽秋聲館性靈詩。

題說石後

石不能言我說之。壽山溪上住多時。可憐石錄猶難據。無怪諸家浪繫辭。

題山水贈友

開枝磊石都無法。一路煙嵐鬱不分。酒後興來憑腕底。昂霄聳壑會風雲。

題野老山水次勻

文章浩淼同觀海。氣質稜森等看山。一顆冬心一枝筆。巍然三絕出人間。胸無邱壑莫臨池。我讀佳章信有之。喜得公詩又公畫。詩中有畫畫中詩。乍披法繪意先飛。如此江山畫亦稀。想見濡毫靈氣滿。居然神妙入幾微。前輩風流歎勿如。卅年湖海意多違。別來分作烟波老。一讀新詩興有餘。

題山水

林壑欹崎薄點苔。一泓清淺淨無埃。祇愁菰蔣妨詩艇。爲闢花磯引客來。

題畫

故里江山看不窮。謝公墩上坐松風。虬枝故作蒼藤繞。爲恐歸來盡化龍。
中峯直上層雲外。一派東洄萬柳西。可惜主人歸未得。苔痕綠滿釣魚磯。

卽事

貧僮器案命

當年花縣賴傳聲。今日茆齋忍別卿。勝是寒郊立仗馬。送君春殿聽長鳴。
素伴文房別後情。因君得價破愁城。萬緡料够油鹽計。買箇鷄兒報五更。

題野老讀書圖

喜見嘉陵雨後山。衿懷高絕豈能攀。從今不怕黃梅雨。無礙神遊几案間。
腕底煙雲起墨池。藝林今又見羲之。意先筆到生神運。一幅城南野老詩。
一叢風樹寫如飛。三面屏山綠未晞。最愛斜暉臨水榭。坐聽柔艫杳歌歸。
才筆瑰奇媲美如。清高雅澹亦林逋。此行喜傍龍門席。學步居然得緒餘。

題隨園圖

髻年雅愛簡齋詩。今日披圖有所思。惜我遲生君去早。一燈誰話性靈詞。
小倉山館賸榛蕪。細雨荒烟叫鷓鴣。求徧江南無此本。天留劍外讀斯圖。

題贈詩文學社

先民貴以詩言志。中正和平寄意深。吏部文章開八代。縱橫排挾在虛心。

題松泉

君家自有赤霞標。左挹龍湫卓筆高。爲寫蒼松泉百尺。張來禪榻聽風濤。

題談月色夫人墨梅

有清以還三百歲。能寫梅花重與彭。今日神遊香雪海。十分春意入縹緗。

題畫

誰家茆屋結臨江。一樹梅花燕子雙。萬頃烟波還未足。海紅簾外木蘭艫。

卽景

清溪西度小橋南。柳岸紅墻界翠藍。潑刺一聲魚在網。桃花流水正春三。

題枕琴室主石門墨妙后

殷虛文字探真源。呼起秦斯千載魂。付與擅奴花供養。靈光萬丈鎮江邨。

范英莪王永孝密月索詩

日薄蘆溝起戰塵。桃源何處可容身。西征一萬三千里。到底關雎在水濱。同舟襄漢識雲翹。拋眼縈心暮復朝。畢竟功成將玉杵。東風一夜度藍橋。石湖有女舊知名。江左王郎亦俊英。一曲霓裳花並蒂。白頭人見也心驚。稱意鴛鴦枉費猜。天緣成就豈人媒。請看巫峽娟娟月。曾照銀河清淺來。冰雪聰明絕妙辭。好花開到十分時。玉台從此賡新詠。鏤月裁雲有女師。結子棲香蜜月中。幾回相見意難通。石橋留得神仙住。頓覺山樓便不同。

楚王

楚王愛好誠無說。不在風神在細腰。太息難爲湘澤女。忍飢競學束宮綃。

六宮

六宮罷舞鳳樓前。傳燭分班試踏圓。終讓三郎爭綵勝。寧王笛冷奈何天。

秋閨

秋月融融秋水清。秋閨寥落不勝情。花開鵲報空歡喜。只是關河未解兵。

返棹

返棹丁寧共月圓。春閨送別手相牽。者番幸未尋仙去。差免歸來也惘然。

題王白與藏李復堂墨竹石遺老人豪取其一

白也風流擁百城。妙高寒句萬人驚。家聲獨擅詩中畫。亮節虛心說舅甥。
老可能爲竹寫真。宗揚手法此傳薪。巴山露植無人識。移向君家却有因。
從來四美難爲具。割一廉於海岳齋。寄語主人勤守闕。已將勁節過江南。

寄內對月有感

征途愁見月三圓。多少離情付酒邊。桂水巴山同皎潔。迢迢相望更相憐。
南浮鷺水北燕雲。何處觴題不共君。今日孤吟無限恨。浪傳詩債總平分。
灘江倒影碧如油。一舸双眸取次收。坐對蓮峯心自遠。料君應悔未同游。
還當匹馬略祁連。定要君來共策邊。大野無垠沙磧月。更須斑管寫胡天。

卽事

千山送暝立黃昏。領略西家酒一尊。不住鵲聲細雨裡。輕車穿過柳絲邨。

次獻唐題雙穗樓讀畫圖勻奉答

落日曾樓迹就陳。別來渾似夢中身。錦江近處無山色。百里相尋愁煞人。
一幅披將榻上陳。臥游奚啻在山身。黃金揮盡圖還讀。卽此猶堪傲世人。
未應回首感新陳。滄海虛涵一粟身。對此便須休笠屐。高情能忘畫圖人。

往事居然煩史筆。山樓止合著閒身。轉愁此本傳誰好。祇是兒曹欠解人。
卽事

西風排暑雨濛濛。漲溪橋一棹通。難得嘉賓憐寂寞。携將秋色雁來紅。
寄懷蟄廬

冬山瑟與人同老。故息吟鞭待雪看。說與能詩馮蟄叟。好留尊酒破春寒。
同雲低覆草堂虛。爲探春情且問渠。老我消愁更何物。梅花詩思兩何如。
天涯落莫惜分飛。回首前塵事事非。留得交情嵇阮在。一吟一和勝當歸。
法繪豪吟已足傳。無須把酒問青天。而今莫再癡龍蟄。尺木歸君我自憐。

題儼少畫梅

畫禪入室有知音。數點蕭疎天地心。我謂冰枝留半面。寒宵好待鶴來尋。

題秋林逸趣圖

秋容明瑟真難寫。紅樹清流挂落暉。我望江南歸未得。六年閒煞釣魚磯。

題畫

瘦西湖上草如茵。回首呼船向水濱。折得並頭蓮一朵。歸來好贈倚樓人。

次蟄廬勻奉答

對花遠憶隴頭人。一讀新詩四坐春。想見草堂香似海。可能容我結芳隣。
戰雪衝寒亦故吾。冬心曾未昧終圖。祇當落月增惆悵。添酒巡檐秉燭奴。
喜見國花詩百詠。行窩端合署梅邨。高吟一字千年響。奚事推敲月下門。

來函囑定其詩

休嗟國計非無策。坐望河清豈是謀。便欲從君鄧尉去。相期蠟屐望吳樓。

讀蟄廬詩畫

詩畫都憑立意新。和平敦厚寫天真。不工側媚存元氣。我見雲中露一鱗。

氣韻非關工力來。鈍根難上妙高臺。純豪屈鐵無多子。獨拜先生紙上梅。
筆花開出多奇氣。不落言詮只譽君。不是探驪珠在握。那能腕底起烟雲。
領略梅香詩更香。一枝一語自安詳。畫成想見題詩候。五嶽羅胸氣莽蒼。

次純清上坐戒詩句

千秋鑑戒祇傳詩。爲逐修羅入藕絲。具出世心行世法。天空獅吼震當時。
抉疑起信藉詩媒。敦俗移風要辯才。喚醒沈迷千萬衆。一時都頂佛香來。
野燒難留書帶草。春風吹看再開花。利根不落鋒機語。正是禪宗未長芽。
隔陰敢執無言法。霖雨無憑是亢龍。我本台宗禪弟子。故宣佛號上中峯。

次野老句

老我墻東望水西。一春斷飲爲吾師。可憐藏釀無方法。直到開尊覺有差。
短才止合作閒人。萬里浮家爲結隣。坐挹光風塵自遠。霏來新句氣同春。

路出城南別有天。疏籬藤蔓自相牽。高齋流水千竿竹。便不樓居亦是仙。
小圃新苗雨後肥。堂前語燕任高飛。天酬世德惟清福。鎮日尋詩踏月歸。

陶園

陶園秋景最宜人。草木榮於河北春。豈謂巴江地脈暖。要知氣運轉鴻鈞。
入門夾道草青青。錦字坡西六角亭。一沼野荷花未落。重重樹列翠雲屏。
領略風光步步留。于思人倚水邊樓。沿花行出桐陰路。一帶農村翠欲流。
豹隱名存寔早亡。重來人事幾滄桑。但從密竹疏籬外。猶見吾家薜荔牆。
桐陰蕉影徑通幽。一角飛簷雲漢樓。聽到書聲疑舊雨。閩江撩起十年愁。

題寄廬詩存

欄前蝶影徵詩妙。塞上燕雲寄意深。到底君家最風雅。莫因風雨廢高吟。

廿四拐彎

走玉盤珠廿四彎。窗開面面見青山。此行飽攬林泉趣。較勝髯徐見一斑。

題李百川兄畫梅

詩情貴曲梅猶是。破萼含苞未盡開。試看橋邊清淺水。不時風送暗香來。

題撫松圖陸儼少繪贈韶仿者

倦遊五嶽閒來撫。儘把高懷寄古松。會有風濤鱗甲動。人間何處認真龍。

柬王獻唐

草長郊原胡馬馳。投荒惟益鬢絲絲。劇憐天寶西征後。一曲傷心凝碧池。
欣見朝家登俊彥。野夫猶自佇行滕。中興鑑戒歸青史。喜得高人王右丞。

別內

西南山水縈心久。相約登臨共倡酬。揮手黯然成獨往。倘將新句寫離愁。

二塘

繞郭梯田麥浪黃。農夫引水灌新秧。峯巒滾滾隨車遠。明月簫聲次二塘。

題畫

一帶疎林四面山。數椽茆屋縛其間。閒人自與閒雲等。竹杖無心任往還。

寄珠草堂

入世原同露電光。平生何止一滄桑。傷心龍劍驚飛去。剩有靈珠寄草堂。
愛憐忍讀蟄廬詩。生死交情想見之。獨我沈珠搜不得。題圖擱筆淚如絲。

蟄廬與倚仁交厚因及小青事

次蟄廬句

讀君圖句見交眞。萍梗荒江德有隣。但使奇文能共賞。秋風奚事定鱸蓴。
谷鈴玉笛總堪驚。老去眞成草木兵。一顆明珠新入掌。草堂端的可憐生。
莫道斜陽歸路賒。有人歲歲計還家。劇憐嬌女音書邈。愁對君移九畹花。

喬松千尺庇靈根。一幅新圖認舊痕。明月梅花原是夢。暫收老淚過青門。

卽事

細柳扶隄綠滿江。素心人在木蘭艫。賺來試打船頭槳。婀娜容光鏡裡雙。
隔岸炊烟一縷斜。遙知竹裡有人家。獨憎絕世雙螺女。偏就無人處浣紗。

游山

遊山人說宜晴日。我喜登臨及雨天。舞樹婀娜泉縱壑。斷雲滃起綠生煙。
林壑一邱宜近領。但窺全景不妨遙。撫琴竹隔臨流水。夜月松風和洞簫。
看山事與衡文等。須把沈珠碧海探。開合相生綜體勢。此中靜趣要深參。
好山端是春閨女。婉孌應爲悅己容。不是知音安解賞。大都走馬過花叢。
溪山自入詩人眼。幽秀雄奇細味來。太息鴻文遭俗手。寶山雖到却空回。

卽事

雲峯雨岫窮姿態。我爲名山六載留。春到青城花滿徑。一枝藤杖更難休。

答上清宮朱道士

浹旬雨雪與風晴。勞爾披荆取次行。回首依依拋不得。好山原自最多情。

卽景

乘濤山欲吞江下。飛濕禽多入葦中。舊雨移尊魚作膾。曲欄吹火白頭翁。

寄懷王獻唐

明湖水浸鵲華青。落日西風野史亭。此事十年勞夢想。不知何地著文星。
斷續風吹子晉簫。嘉陵春水繫詩瓢。也知客久家成泛。一舸能來萬里橋。

整廬時報行踪

世說王郎筆一枝。宜詩宜畫妙難思。吾家雙穗樓虛敞。安得奇文共讀之。

題山水

一壑蒼松萬頃波。是誰枯坐石盤陀。要知面壁觀心法。那管連峯起伏多。

雲峯

丹山碧樹盤江路。人在關荆圖畫中。倘許結茆容我老。一竿長日對雲峯。

韓家店

煙嵐縹緲韓家店。一道虹橋寫玉泉。鳥語巖花紅幾朶。還疑桃洞值飛仙。

黔靈山

仙都鑲翠一重重。到處摩崖認赤松。清晝書聲今已邈。黔靈何日再聞鐘。

思鄉

芒鞋踏徧隴頭烟。小憇江樓弄七弦。只是杜鵑啼不住。杏花細雨問歸船。
故園東望路迢迢。一寸鄉心付蠟燒。如此風波行不得。江南春雨正瀟瀟。

題野老作雙穗樓讀書圖

詩人法繪具神功。山水都涵書卷中。南日曾無遊屐到。卽論奇想入空空。

再次題拙畫句

不圖書拙得詩功。正賴神傳阿堵中。漫譽駑駘能健步。那同天馬自行空。

次野老元句

讀書學劍兩無功。垂老栖神畫事中。一幅携來山水好。直教筆筆欲騰空。
一山一水十年功。神運能歸掌握中。此法休爲下乘說。塗鴉畢世不凌空。
能事亦憑點染功。煙雲滃起遠山中。最難取得林巒勢。結構還求密裡空。
鹽車困頓果何功。誰識乘黃一顧中。冀北儘多三萬匹。自公過後歎羣空。

詩碑

領公秩事已難知。嵌壁西齋尙有詩。隱隱幾行懷素草。重揩老眼立多時。

次老漁句

一棹烟波未有涯。江蘆風月不須除。讓他孫子拏舟穩。到處魚多便是家。

次老樵句

獨憐翁子去無端。垂老趨炎棄翠巒。輸我一肩還健在。青山事業本來難。

次老農句

當年烏犍駕犁飛。橫笛歸來起武遲。今日龍鍾思買劍。可堪腰帶不成圍。

次老儒句

破來萬卷果何功。還是青燈影一叢。猶恐兒孫弛夜讀。爲繙周易衍窮通。

次雲山師句

東風逐絮過青溪。空剩垂楊杜宇啼。莫嘆日斜歸路遠。有人還在夕陽西。

次春覺齋病起句

晚霞紅映傲霜枝。政是丹霄選佛時。已辦離塵還小住。都緣一局未收碁。

九洲戰伐鬪金秋。兵氣騰衝貫斗牛。應爲蒼生拋不得。行滕隨止白沙頭。
病起新詩付管絃。人人爭指米家船。楓林一片江山影。未似春秋隕石年。
西州避地願多違。爲謝塵緣象教依。喜見文星猶炤世。高齋何處儻搢衣。

白沙雜詠

風波宦海沈身久。如此江山作計遲。日出沙洲尋白鷺。雲歸蕭寺罨秋池。
蝦須簾子漾飛泉。剪取花溪十種箋。我愛澄心堂製好。一輪明月浸江天。
人言有竹能醫俗。我擁修篁十萬竿。四面濃陰寒翠裏。勝它人戴竹皮冠。
手栽細柳漸成園。淺草扶隄綠上衣。留得江邊三尺地。還思築個釣魚磯。
不才只合老煙波。沙白江清好結窩。坐臥自便疏嬾甚。媿勞枉顧問如何。
江風遶綠過前邨。江水拖藍直到門。閒坐江邊迎素月。一匳翠玉湧冰盆。
左右飛橋駕彩虹。淩波閒步履行空。濤奔激石機心息。彼岸寧煩一葦通。

信步無妨路短長。興來幽谷訪嵇康。秋山雨後千巖濕。灑入衣衿花露香。
堂前花氣穿簾入。江上簫聲隔雨聽。好景當前吟不得。憑誰妙筆寫丹青。
蓼花窗外紅於火。一夜瀟瀟便就薦。人世榮枯同此理。不須艷羨不須憐。
風過閒階香滿庭。隔山霏雨失前汀。一聲長笛江天暮。細點紅袍話幔亭。
一山楫讓一山迎。一水潏迴大有情。我就此中結茆屋。心期長對白沙清。
雲山勝處界溪流。弱水何曾有度舟。赤足臨深釘步滑。磊石度水俗名釘步教人那得
便回頭。

一片菁葱細路分。林巒隱隱起氤氳。山禽啼處秋花碎。欲倩徐熙寫夕曛。
一蹊落葉容安步。千澗飛泉足盪胸。最是此行不孤負。趙公山上坐松風。
芒鞋元不礙蒼苔。去住臨流不著埃。日落沙明菰蔣裡。秋光引出白鷗來。
行雲歸岫雁飛蘆。水色山光入畫圖。試向清流添小艇。定教人喚作西湖。

嵐光流黛漾玻瓈。兩岸蘆花雪滿溪。一帶青蒲倚紅蓼。最銷魂處小橋西。
索橋西去索橋東。山北山南碧樹重。記取白沙江上路。巢居有個白頭翁。
棲鶴觀中苔滿地。蟠龍橋下水噴銀。月明風細秋光裡。可憶江邊兩箇人。
雨窗祇覺秋宵永。驚見江蘆已白頭。人世百年翻恨促。且搔皓首戀更籌。

經劉繼老故宅感作

斜陽門徑長莓苔。想見龐眉肅客來。林下書聲今已渺。園花雖好爲誰開。
澄清攬轡大江東。早歲功名海內空。過眼繁華春夢短。等閒詩酒老英雄。
滇雲皖水空遺蹟。書劍飄搖十八年。垂老投荒人不識。掃眉才子共安禪。
玉釵恩重難爲別。常日書空向暮雲。畫稿詩篇誰管理。鈞天一曲斷知聞。

題澄懷閣梅花百詠集

高詠梅花百首詩。橫斜疏影想水姿。天香本是君家出。夢斷孤山中酒時。

題周儀先峩眉畫展

讀君百幅峩眉畫。回首前游白髮新。今日汴梁鴻待哺。願將大筆繪流民。
一山一水任勾留。橐筆當年事壯游。記否白沙風雨夜。披圖同賞劍門秋。

題蟄廬吟稿

畫梅體貴橫斜勢。詠物篇難風雅詞。知否有人花下坐。一壺清酒把君詩。
君詩妙得劍南神。峻拔雄奇字字新。感激心情南渡歲。拋將血淚作詩人。
詩人自古例窮工。海內詞華過眼空。安得黃鐘驚軟夢。看君大筆起頽風。
頽風氣運總關連。習俗相沿二百年。自是君身有仙骨。靈山長湧洗心泉。

自題

清詞秀句前賢盡。土埂醯鷄待老夫。若說可傳吾未信。爲祛愁病豈能無。
平生約足五千首。冷暖辛酸只自知。秦牛流離行役裏。艱難付與後人思。

卽景

策杖盤流一徑斜。綠陰深處有人家。行吟頓覺香來細。簷角風開扁豆花。

鑒儂來書卓其語爲詩却寄

江干常日盼行旌。尊酒徒留敘別情。豈是荒邨人事廢。可知消息隔重城。
錦水浮來六六鱗。白沙歸去及殘春。鶯花夾岸輕舟穩。定有新詩慰細君。
金萱高蔭晚霞明。笑語堂前喜氣盈。拋得一官休遠憶。承來慈愛勝浮名。
陌上花歸樂可知。比肩人唱白香詞。新聲慢倚翻歌拍。忙煞蘭臺筆一枝。
小樓一角浸冰壺。偕隱塵囂半點無。畢竟幽居稱膏渥。田園那得便荒蕪。
空谷蘭花香遠聞。教人何處不相尋。只關劍氣終難隱。坐臥名山豈在深。
錦城花市劇撩人。士女青羊喜問津。我臥荒江娛靜趣。不因世熱謝煩塵。
索居久亦動遐思。寄遠抒懷輒有詩。俚句祇當漁唱聽。慎毋出示女宗師。

懷壽白鞠生兩先生

振翮同乘海運風。四維上下見虛空。爭田拓地徒多事。世界還藏芥子中。
繁花上眼一重重。今日蕉爲昨日穠。豈必蟲關鷄得失。九洲何處不癡龍。
客齋香案供樟梨。十幅蠻箋寫赫蹄。久蓄蠟丸無可寄。放歌曼度白銅隄。
壽公史筆鞠公豪。畫理詩情眼界高。我於今時尠推服。當前直欲棄鉛刀。

題鞠生先生山水

縹緲中峯接絳霄。五雲樓閣點山腰。嫋嫋應是無人到。喜見飛仙王子喬。

題畫

斷雲巒岫接烟霏。平楚橫空漸入微。面水坐來心自廣。子規底喚不如歸。
次純清上坐巴嶽春興元勻

繁華舊夢裊輕煙。留得名山著大賢。巴嶽風高春滿望。成蹊桃李幾多年。
盛事空傳細柳營。壁門不納勞軍旌。戎衣解脫風雲際。迸作松篁梵貝聲。
只有蒲團不可刪。壇經一卷日周旋。盤桓便是圓通法。月印澄潭水在山。
斷雲削壁亡言妙。橫亘空山樹畫屏。靜覺耳根人報語。勝收麗句唱旂亭。
泉石繞居塵事盡。清風明月與閒人。坐間自見衣冠古。眼底誰知境界新。
鳥語春花燦滿坪。谷風拂面解餘醒。登峯時覺雲黏袖。遽作如來接塔聲。
我事行修君坐功。度人度己願無窮。而今可廢華嚴課。直指心源是佛宮。
卅年無改行吟樂。過眼空花神識清。坐上還勞時一顧。可能聽取夢中聲。
和風滄水養心田。渙到王居不著邊。乞就如來分半坐。一時頓記我先。
舊蹊踏盡厭聲聞。未用蓑衣帶雨耘。有物盡歸眞色相。飛花流水過巖雲。
坐到明時不伐功。春花秋月異纖穠。諸天雨細一欄藥。九地風雲半壑松。

古木蕭疏莫怨嗟。東風吹到再生花。逢迎通塞緣前定。漫羨藤蘿絢曉霞。
天留午寂與人閒。坐出它山見此山。欲就德雲問究竟。爾時還賸幾年艱。
望見靈山不看經。樓深閣迴誤多情。六時長念心頭佛。漫笑頻伽苦費聲。

次純清上坐寒句

三月東風遞曉寒。煦花轉又剪花殘。傷春杜宇防春去。不住飛鳴傍釣壇。

題陸儼少兄畫梅

一枝疎影寫橫斜。豈等房州三朶花。此際孤山正霏雪。六年猶自滯天涯。

落花

開到荼蘼花事殘。癡心蜨尙守雕闌。分明一幅擘紅怨。留取它年故舊看。

植物園

椰子檳榔飛翠葆。立身修潔有宗風。我來林下攤書卷。欲付心情與畫工。

四季花開嬌可憐。便無香也礙空禪。老夫參透根塵相。願出人沈色界天。

題詞

東萊林修竹茂泉

讀君雙穗同心草。詩筆清高各出群。趙管風華元絕世。秦徐才調更無倫。
三巴八閩吟懷濶。曳玉聯珠吐屬新。一代騷壇欽璧合。長留大集照千春。

靖江劉明水

白頭偕老元堪羨。彩筆同心此更難。碁罷芸窗春共醉。詩成鳳閣玉交鑽。
三生有福緣前定。雙穗徵祥卜永安。自是陽和蘇萬類。瓊樓高處了無寒。

達縣周蜀雲

修來福慧人爭羨。白首同心並世難。玉案聯吟春門韻。金鐙繙易夜研鑽。
琴堂草長鴻慈溥。雙穗樓高鶴夢安。童叟熙熙歌挾纊。祁年瑞雪不知寒。

王佩芬

塵寰豈易求知已。琴瑟同心曠世難。林下清芬推獨步。風前高唱帶禪觀。

祥徵雙穗謳歌遠。緣證三生鴛夢安。綵筆淋漓鸞鳳字。卿雲繚繞碧虛寒。

大名馮復光蟄廬

文章知己閨房內。患難相從自有真。異日登樓問歧穗。先要詩侶畫中人。
雙穗記樓今讀書。漁陽歌頌並千秋。息機無待雲泉約。福穗多君幾世修。

雙穗樓吟艸

下集

浙東王佩芸

相思樹爲枕琴夫人作

送君之行纔平肩。望君之歸樹參天。菁陰密葉隨年長。綠鬢朱顏豈是前。
送君別後虛粧鏡。春闈日斷天邊訊。卽看燕燕總成雙。若比鷓鴣不離寸。
自奉裳衣十五春。玉臺韻事尙如新。後湖酒醉西樓月。東郭鮮烹錦水鱗。
君情颯爽廣交識。裙屐翩翩轂相擊。有時報客索詩書。宛轉來乞阿儂筆。
沉醉歸來每夜深。解醒削藕撫瑤琴。宮絃拍拍平沙落。綉被傾身祇讓君。
四年頻兆蘭徵夢。一索阿龍再阿鳳。鹿車手挽案相莊。不復梅花作三弄。
萬里同浮碧海槎。一身保抱兩嬌娃。於今都已更人事。幾見如君做阿爺。
當年送別西昌郡。扳條記取低聲問。君言飛絮是歸期。傷心那悉違心論。

燕來雁去幾多回。見影聞聲百念灰。西昌倘是溫柔地。爲君設想莫歸來。
索居荏苒叢百病。形容枯槁中氣悶。徹宵只是不成眠。起坐作書頭發暈。
且從秦嶺寄萍蹤。夜雨淋鈴南北風。歷歷求君詢過客。強爲懽笑叩行蹤。
門前車馬流如水。西去東來携素侶。只儂憔悴孰相憐。一點寒檠一稚女。
小舸南風返錦江。簾櫳依舊不成双。西隣舊伴還相顧。錯認君歸話隔窗。
窗前柳絮飛片片。飄入清波不可見。相傳點水化浮萍。再生乃作美人面。
我不紅顏亦可憐。傷春傷別錦江邊。君原浪隱非農隱。愁對斜陽樹拂天。

蜀雲行

峨眉秀。青城幽。雲棧險。瞿峽流。瑰麗詭秘不勝收。如此江山世無有。劉季
以之家天下。王嬙武曌各仙才。文士詩人粲人口。普賢台下長明燈。一瓊
飛來化蜀雲。白玉床前調綠綺。碧紗厨外裹紅綾。左芬宿慧敦經史。道蘊

才名號進士。讀盡中華以外書。走遍歐海而西路。殊方亦自有佳人。玉鑿金鬕閃碧睛。白雪肌膚春綽約。迎風裙袖逗風神。同窓驚睹東方美。秀外惠中媿難比。拔幟騷壇此霸才。振筆爲文猶宿擬。郎希學府有徐君。玉貌懷才信邁羣。自讀謝庭風絮句。不禁拜倒石榴裙。海灣何處消長夏。石橋每稅裴樊駕。萬縷絲纏楊柳樓。一寸心馳明月夜。珠喉宛轉發清歌。太息韶光付逝波。金字塔前閒賭韻。虹霓灯下舞天魔。螢窓雪案情彌厚。因而商量同白首。盛賦詩歌奠雁辰。論功不用謝媒酒。珠聯璧合總天緣。只是銷魂幾少年。此時乍醒枕榔夢。此際無言各自憐。巴黎屈指經三載。筆陣心兵論文戰。城北固當一著先。蜀雲終爲三軍冠。海外光輝學位新。歸颿合番錦江濱。一雙博士同床第。十閩文壇位壁人。鐘鼓三辰鳴九酉。才名燦爛動開府。賓主東南百尺樓。法治講求歎希有。無端冀北戰雲開。一舸

烟波蜀道來。親就縣陽樹桃李。更來筑右育英才。我於伉儷相知久。唱隨福慧羨良友。才華學術總相侔。鸚鵡雙飛眞異數。爲題長句送征騑。未到江干魂已飛。好共徐郎頻寄鯉。莫教秋鬢淚沾衣。

昨夜

昨夜聽瀟瀟。凌晨有秋意。江樹碧欲流。雪山極天際。我欲涉江遊。野航恰容濟。最愛板橋西。好花開並蒂。

和外

徘徊有所思。更闌還悵悵。溶溶今夜月。如見君容樣。韶光荏苒忽驚秋。別意重重無限愁。審識征騑王事監。料應有夢到高樓。

題白紈扇圖

新裁白紈扇。障我青春面。自來紈扇總長圓。生恐紅顏容易改。妾命曳游

絲。郎情厚若紙。寄語新人著意憐。它日秋風莫若此。

謹次家大人元句

烽火關山隔。思親淚不禁。流光彈指過。往事費追尋。客舍三更夢。天涯萬里心。故園開浩劫。忍又問升沉。

寄外

遠客音書邈。深閨望眼穿。夜長愁不寐。夢斷隔江煙。臘鼓催心急。梅飄作雪天。寒衣何處寄。萬里問征船。

對月寄懷

十旬懷遠道。千里共清暉。如此欒圓夜。王孫胡不歸。

送別

錦水結芳隣。驪歌又及春。前途煩寄鯉。風雨最懷人。

寄外

巴山懷遠道。無語立斜暉。極目江雲外。飄然一雁飛。

寄外

別久思尤切。癡兒病待療。寸心猶火炙。萬緒湧江潮。客店知鑿伴。蘭閨怨夢遙。喜來青鳥使。稍亦慰無聊。

次吳櫂仙雪梅句

乾坤新琢玉。庭院更飛花。念爾迴風舞。和梅映水斜。酒懷消不盡。詩意轉應奢。喜讀高人句。敲冰自點茶。

落日

落日西樓望。移時月上窗。憑欄思欲絕。顧影不成雙。

喜得津書

秋老白蘋洲。懷人無限愁。置身高閣上。極目大江流。珠玉輝三蜀。風雲黯九州。所忻萬里信。猶向敝廬投。

望江樓雅集依勻

東郭登臨江上樓。牙檣錦纜望中收。玉顏絕世猶嗟命。金井雖存不浣愁。六幅圍屏徵妙句。滿園脩竹與悲秋。流觴水底溶溶月。一曲箏琶韻自悠。

文君井

情愛那能藥可醫。文園一臥素心違。琴聲未改當時韻。腰樣驚非舊日支。何苦成都親壓酒。幾教中道賦披離。轆轤注定紅顏命。金井終嫌波起時。

薛濤樓

錦城東峙薛濤樓。風物長江眼底收。那有枝迎南北句。只緣藉沒古今愁。一鞍細馬馱紅雪。六律清音入素秋。曲水池邊修竹裏。波光雲影日悠悠。

浣花溪

清淺溪流合浣花。蓬門誰是四娘家。詩人一語留千古。騷客都來問紫霞。
陌上草迷蝴蝶醉。橋邊風度酒帘斜。不堪重理歸時棹。萬杵砧聲咽暮笳。

寄外

雙飛西出萬重灘。避地都忘蜀道難。對酒深言防薄醉。添衣歸思動輕寒。
郵書差慰倚閭望。烽火無妨故里安。會見秋風吹落日。扁舟好載客星還。

卽景

錦江新漲碧涵天。垂柳陰中繫畫船。千尺虹橋低臥水。幾行秋雁遠衝烟。
人來綠樹紅樓外。思入青菰野蓼邊。何處洞簫明月下。一聲聲破想夫憐。

編草帽

蓬門深處鑱歲麩。秀茁霜條好護持。素手燈前披乙乙。靈心帳底扣絲絲。

彈來合有人相慶。將去猶愁樣失時。織得月圓成一笑。爲誰覆上遠山眉。

柬盧子鶴先生

節序登高曷可磨。當前泉鳥自笙歌。茱萸待插人還遠。才福相衡我未多。後會不知奚處所。盛筵其奈別離何。收京同載東舟去。華頂山頭醉碧蘿。

次茂泉先生六十自述句

歌管南山慶引年。東風裙屐集平泉。酒懷曲水剛三月。詩興梅花足百篇。才筆合稱天上客。釣遊還羨地行仙。吟身恰與春陽俱。倩影橫窓夜未眠。花影池塘分外嬌。垂楊乳燕過新條。香霏瑤圃迎朱鳥。琴操清音出絳綃。曾是開河規禹蹟。何須投筆事班超。蒼生尤切牽夔望。好把經綸翊盛朝。

春曉

春光爛曼粲春華。疎柳舒青漸放芽。別院鶯聲初入耳。隔年燕子未還家。

何須定覓台城路。纔可相逢油壁車。祇是王孫歸未得。一船琴鶴尙天涯。

次外寄懷勻

西山深處有仙津。洞口營居息此身。疎植竹枝防蔽月。多栽桃樹避苛秦。
一渠水淨心房淡。四季花開鼻觀春。可惜浮名還未了。白頭猶是宦游人。

何處

何處飄來蕭寺鐘。碧桃枝挹露華濃。休誇暖玉雕爲枕。不信銷金始作櫳。
半夜誓寒山海重。一春心祇水雲通。世人都說蓬瀛好。便到蓬瀛恨萬重。

觀話劇

驚魂數到五更鐘。偎頰相看淚點濃。耿耿星河散人影。鬆鬆雲鬢揜房櫳。
只愁紅藥花難寄。莫說藍橋路勿通。春去日長渾似歲。任教粉蝶度花重。

題家大人海天漁舍圖

白雲祇在海天東。六載羈愁有夢通。早向荷塘侍春釣。今來蜀道阻秋風。
矮檐比舍圖堪認。作伴還鄉意定同。差喜靈椿長不老。明霞高映夕陽紅。

呈家大人

頻年宦海厭風波。卅載光陰客裡過。忍見烽烟迷禹甸。欲銷兵氣挽天河。
身浮萬里音書邈。燈爇三更感慨多。早晚王師清海宇。承懽好唱泰平歌。

卽事奉答雲漢廬

他鄉話舊致纏綿。蕉底池頭坐晚天。煮茗清譚當酒後。添香賭韻在燈前。
樓凌雲漢居仙侶。腹滿珠璣寫玉川。美眷故應塵世少。雙修福慧鎮相憐。
才筆風華炤眼驚。高譚妙論氣縱橫。帆歸銀海題紅葉。譽滿鸞江主碧城。
薇省奇文推獨步。蕉窗麗句總雙聲。荒樓不有雲英賦。那得人傳雙穗名。

次雲姊句

滿眼溟濛濕暮秋。可堪買棹蜀江頭。十年舊雨隨雲散。一卷新詩寄興悠。
烽燧只今彌大陸。家山何處獨登樓。合將杯酒澆離恨。莫話傷心且放愁。

哭狗

天寒歲暮欲何之。鑱鑰重安繫夢思。霜漬板橋春去後。風搖鈴索夜歸時。
緘金每佐厨娘職。曳玉常依主母慈。抱得小同來牖下。爲汝身後立新支。
睡足紗窓日已高。西園花影覆神葵。寧同世俗張牙爪。敢謂時艱惜歸毛。
喜聽金鈴先客到。長窺綉戶替人勞。韓盧若也論勛伐。合使金吾讓錦袍。

次蟄廬勻奉答

秋河迢迢帳嬋娟。孤負韶光感逝川。錦水久虛求鳳操。巴山新致買花錢。
同心帶結眞稱意。挽鹿車應早著鞭。況是比肩題柱客。當鑪誰復不推賢。

臥病寄外瀘江

飛花飛絮困人天。扶病匡床祇自憐。何許簫聲來枕上。幾多鄉思起燈前。空階淚點巴山雨。長夜愁牽瀘水船。一卷彌陀修淨業。待除煩惱懺情禪。

敬次雲漢樓感懷元句

遠霏詩句見情深。玉扎琅緘一再臨。顏色猶親千里夢。文章已負百年心。別來人事愁銷骨。子姪死傷歷盡艱難耻拜金。久客甯爲菰米計。天涯差慰有知音。

世事都如優戲場。何須衣錦始還鄉。勞生大抵萍浮水。幻境無分蝶夢莊。儘有霜風催鬢髮。但看雲影想衣裳。四年莫遣相思苦。何日陶園話夕陽。歸心久已箭離弦。曉夢驚回最可憐。開眼依然存笑貌。孤舟猶是阻烽烟。問君那有理愁地。止我真生離恨天。亂裡準情求亦恕。一家團聚卽神仙。更從月下憶花顏。雲漢樓高不可攀。大筆昔曾輝碧海。新詩今又占名山。

綠蕉紅葉非常艷。小草蕪辭祇可刪。記取嶺梅香到日。上清月夜扣仙關。

次雲姊寄懷句

歲月催人感鬢絲。天涯貴有舊相知。遠書慰我無窮意。多病憐君迭寄詩。獨客巴山休中酒。隻身蜀道況秋時。空階未免蒼茫想。細雨飄風縹一池。

賀英莪舉子

孤矢高懸應斗躔。雲門積善降飛仙。適逢晉爵傳雙喜。纔過端陽又十天。稽古盛稱萬事足。讓君樂趣一家全。同心結子棲香暖。寄語寧馨著意憐。去歲初斟合喬栢。今朝喜見玉嬰孩。春花桐葉垂垂茂。薛鳳荀龍奕奕來。華夏於今重生聚。德門自古育英才。城南淺草秋坪裏。添箇嬌兒笑口開。

次雪香樓落梅句

天香風折上林枝。野店溪橋悵所之。今日江城聞玉笛。當年東閣憶冰姿。

還期神劍延津合。賴有清標濁世持。澼鹵嘔心休自苦。孤山我繫夢中思。

次香雪樓句

攬鏡愁生鬢影絲。此中心事有誰知。三邊鼓角縈歸夢。九地烽烟輒寄詩。
閩水同游人去早。巴山夜雨我來時。淒清最是隣家笛。吹起冰紋漲一池。

次雲漢廡句

祇是陶園最繫思。梅林湛露濕燕支。對樓燈火輝猶昨。隔雨淒涼味此時。
未報高情山簡扎。重勞新惠玉溪詩。風萍忻合東西國。石上三生定可知。

歲暮送別

靜夜燈昏有所思。沉將遠別益難支。蒼茫客路憐今日。歷碌年光欲暮時。
牕外寒梅初釀雪。樽前含淚更吟詩。玉關珍重依風馬。直躍天池且未知。

次勻奉題春雨樓圖

板橋支出畫樓邊。倚檻聯吟炤影翩。雙槳剪波青雀舫。夾隄流水綠楊煙。
連山翠聳隨心遠。別浦歌迴入耳纖。鎮日簾櫳香子細。風光收盡五雲箋。

疊句

度劫風霜閱歷深。傳經便是後凋心。不期明月寒江路。重對高山流水琴。
佛座白蓮香皎潔。雲樓碧樹引清吟。時衰大律銷沉久。喜聽周岐曠德禽。

簡呂夫人

連宵解榻見情真。玉案雙清印水濱。妙句霏來高翥鳳。早梅留賞小陽春。
還愁笛裡巴山月。最羨樓頭跨鶴人。指顧東風開闔苑。移花好結孟家隣。

題雲漢樓圖

仙山縹緲位江臬。一角吟樓接漢高。雲影日斜迴菊徑。詩聲風送和松濤。
前蹊策杖來詞客。瀕水垂綸看釣鰲。難得功成偕隱樂。而今四海幾人豪。

寄外

庭階連夜雨蕭蕭。生恐園紅逐漸消。別雁將愁貽遠客。還雲何日聽吹簫。
眼迷花霧忘歸路。心怯車聲過小橋。無限離情無限思。一鐙相對坐通宵。

次蜀雲夫人句

別來雙鬢漸成絲。苦語何當報故知。錦水遠霏金馬賦。巴山遙和玉臺詩。
荒樓那得伴雲漢。秃筆祇堪記歲時。喜聽華居借徐榻。夜吟人影寫秋池。

再疊雲漢樓感懷元句

不息征車到夜深。雲樓燈火喜登臨。重逢莫下尊前淚。把袂難描別後心。
會裏相思寄青鳥。還隣垂老感黃金。荃材祇合同樗散。何冀東南有好音。
羞調粉墨再登場。裙屐翩翩會水鄉。忍聽哀猿啼夜月。喜看奇驥騁康莊。
慈雲人庇千間厦。保育宵縫二尺裳。吾黨光耀昭後禩。青梅竹馬樂春陽。

世道由來直似弦。人情翻覆總堪憐。操刀不割徒滋蔓。擣麝成塵任化烟。
霜後步舒黃葉地。風前人悵白雲天。莫愁九轉丹鷄得。渡出迷津便是仙。
冰肌玉骨稱容顏。俯首傾心仰欲攀。豈意琴書拋劍外。不期文酒會巴山。
高歌白雪人難和。野徑枯藤我待刪。從此比隣殊有幸。冷香和月度重關。

閒情

鑪烟裊出畫樓空。曲沿香生淡蕩風。芳草隔簾無賴綠。榴花照水可憐紅。
不知玉貌還誰好。但願郎詩比我工。翹首明星河上燦。秋宵何處逗青驄。

次外紅梅

閨苑移栽鐵骨紅。折枝瓶插向東風。蕊珠身世平安頌。紫府樓臺曲折通。
坐對朱霞神自遠。橫拖碧水意尤濃。玉人懷抱誰高潔。俯仰寧爲悅己容。

次綠梅句

遙從南浦憶水姿。曾是孤山著令儀。野水碧涵新月。虹橋綠過折迴枝。
未妨策蹇携紅友。何苦酸心鬥黛眉。金谷香霏珠已邈。東皇終是欠嘘吹。
獨見花開獻歲時。羊家池館降瑤姬。清宵幽賞春留句。翠被香溫綠入帷。
有客巡簷還自笑。一枝橫水總相宜。可憐別意將誰訴。枉費詞人幾日思。
一縷清香透鳳池。枝頭春意蝶先知。粉衣初鞞過無跡。倩女慵妝更莫疑。
萼萼早窺心已碎。姍姍休怪步來遲。碧桃漫詡同顏色。一見遙知合自悲。
幾生修到瘦腰支。竹外溪邊或可期。料峭江城飛玉笛。撐持鐵幹譜清辭。
采蘋窗外香千本。閣部祠前月半規。六載陌頭遲驛使。羅浮夢斷一枝貽。

調某公

祇寫梅花祇笑君。百篇難致一紅裙。揮殘秃筆行成塚。種遍虛堂不值雲。
可有金蓮來朵朵。空拋楮墨亂紛紛。癡情便得水姿賞。萼綠仙人久軼羣。

簡汪可久社長

八年四海門龍蛇。巴子江邊比建牙。不道長安能久住。分明重慶事無差。
詩來白社歸清鑑。玉立青娥禮絳紗。馮玉立女士早晚扁舟東去也。還將逸興與人誇。

寄外

川西渭北感離羣。握手臨歧萬緒紛。此去艱難吾獨任。從來辛苦總平分。
時當鼎沸應投筆。會看兵銷好策勳。鄭重一言君記取。早歸同作入山雲。

寄懷

碁局沈醺認可眞。長塗珍重別離身。苟安世故何妨達。開到花時便是春。
好趁歸鴻寄緘札。肯隨舞蝶墜紅塵。天涯露布郵傳速。莫羨高樓曙色新。

春懷

春寒薄。醉憶香衾。一樣冰壺貯此心。風雨滿天還路遠。艱難同濟見情深。多君頻示齊雲唱。引我聊爲入蜀吟。無限眞誠來話夜。新詩讀罷有餘音。

鏡

粧樓坐對曷勝情。誰似相憐我與卿。顧影愁驚雲鬢改。開奩光借玉蟾明。描來眉嬾勻深淺。別去腰支判重輕。祇有此君休戚共。不因榮落負初盟。

次 勻

碧玉身家待字年。含情凝睇小橋邊。愁難繫馬何當折。弱不藏鴉祇自憐。晴日剪風春燕舞。柔絲籠水白鷗眠。天涯搖綠誰青眼。纔可相逢又着鞭。

次 勻

月滿簾櫳花滿樓。布衣眞可傲王侯。逢場豈必求青眼。舉案寧辭到白頭。裙屐三春登劍閣。煙波一棹汎江油。新詩敲出低吟際。窗外綿蠻鳥語柔。

次 勻

蕊珠宮裡長瓊英。簾底梳頭照影清。半面窺來渾似我。此中求去有雙成。
眼前眞覺悲歡共。背後誰知黑白明。三五年華羞月貌。優曇一見可憐生。

次 勻

客中最憶病相如。細路借來問起居。踏月論詩誠足樂。隔宵過話尙嫌疏。
要知妙對同觀海。體會名言勝讀書。眼底滄桑多少事。行看續記衍虞初。

除 夕

欲喚冰姿共歲寒。且將玉酒供君歡。一年除盡流光感。萬里遙牽旅夢殘。
牋勞衍波書吉語。香燒寶鼎起詩瀾。仙家尤甚情如海。應有姮娥守畫闌。

寄 懷

卅年人美同功繭。一臥滄江瘦骨撐。秋鬢寧堪今日認。生涯無過此時清。

鏡前歷歷疑春夢。枕上漫漫計遠程。未必征驂留不住。爲君愁聽子規聲。

次雲漢樓句

陶園深處有高樓。嘉樹葱籠翠欲流。酷暑頓教何許去。清吟應在此時收。遙憐立月侵花露。莫忘飛觴到菊秋。愧結隣芳獨憔悴。比君多是一分愁。

壽白伉儷惠新詩奉和

春山含笑迎仙侶。淪茗論心在小樓。鏡裡漫嗟雙鬢影。客中同望大刀頭。地環巴水成盤谷。天遣萍風會益州。見惠高吟難屬和。而今重復發詩愁。

望月寄懷臬齋梁孟

洞口花開月正圓。江頭吟望更相憐。不知春意將安放。應爲詩情未肯眠。客裡漫愁知己少。就中寧讓古人賢。舉頭到處清光滿。可比高門樂事全。

次蔣山青詠燭句

分曹射覆懽何極。一點靈犀透此中。吐出清暉同雪潔。拋來血淚與冰融。
香添紅袖綿宵讀。雨話巴山剖隱衷。生恐飄搖心易燼。縹緗剪綵且爲籠。

次雲漢樓寄懷勻

一雙蛺蝶鬥芳菲。風散滕王閣上飛。角枕斷無花入夢。登樓愁見柳侵衣。
遠書待寄緘清淚。獨客相思對落暉。未免有情憐燕子。呢喃從不隔重帷。

次雲漢樓送別勻

駘蕩輕風日麗天。客中相送蜀江邊。征車待發言難盡。比翼旋分劇可憐。
庭院沉沉空舞燕。山林處處有嘯鶻。傷春曼倩因逃酒。錯被人呼作散仙。

次外勻

玉笛淒清隔桁聞。重樓望遠思殷殷。便教身佩黃金印。可有肩隨白練裙。
倩影乍親旋話別。綺懷莫遣恰秋分。深知韋諷工鞍馬。曷勿東鞭逐紫雲。

香鑪午寂裊烟輕。枉駕驚憐太瘦生。一片羈愁誰可解。滿腔別恨我能明。
花開連理張旛護。豆種相思帶月耕。珍重韋郎勤寄鯉。漫沈碁酒自怡情。
雲龍池館約清遊。疎竹繁花共一邱。萬里良緣元比德。百年佳偶賦同仇。
魂銷南浦人還別。病臥西山東未投。爲起沉疴勞送藥。高情莫報感金秋。
久客愁牽東下櫓。遠書歸夢兩茫茫。嘔心空擬閒居賦。出手難爲急就章。
劍外詩名陸務觀。鐙前歌曲杜秋娘。何時作伴還鄉去。畫舫清尊趁曉涼。

題馮玉立女士結婚紀念冊

經年西社想雲裳。月桂香霏七寶粧。比德合求咏雪者。並肩難得有心郎。
行看花底詩千帙。喜聽閨中樂一章。我臥秋風新病起。幾時携稿到蘭房。

留別

一天風雪據征鞍。爲對征人強自懽。萬里長途思訪戴。暫時小別當應官。

人情留到窮時見。世事要從冷處觀。慙媿青春門顏色。梅花傲骨自衝寒。

無題

闌干寂寂思重重。花片裁詩恐未通。羞對鴛鴦憑曲檻。漫調鸚鵡傍雕籠。防人猜意無妨淡。暫別歡情格外濃。轉恨畫樓蕭寺近。慣驚好夢課晨鐘。

次吳權仙先生句

刻意還鄉迄未能。羈愁難慰一層層。西山積雪謀酤酒。東海揚舲待泮冰。到處活人欽國手。分將安宅舍游僧。西風誰不尊鱸感。豈獨當時張季鷹。

壽汪可久社長七十（乙酉重陽次句）

晚景安榮杖國年。齊眉儷德信仙緣。東籬黃菊香初放。南國聲詩句早傳。闌苑書來修月客。吳羅仙東招飲秋坪筵啓紫霞天。商量介壽宜何物。金石長生祝

大賢。蔣君刻 爲壽

擢仙社長代拈佳韵

見說文星燦水涯。重勞徵詠到荆釵。五絲宮線終難續。一鑑湖光淨欲揩。
騷雅在前誰可並。葑菲自惜敢相偕。汨羅江上烽烟滿。憑弔空縈宋玉懷。

次可久社長句

瀟灑清高孰似公。肯將風節易通窮。瓊樓待月調金縷。翠袖遲郎倚玉櫳。
堪信才華嫌海小。不愁詞賦奪天工。隔年行跡如秋雁。甫到西山別又匆。

先生經年一至

壽雲漢樓卅七雙慶

十一月廿四日

蠟梅釀雪最精神。眼底風光又一新。鴻案詞繙金縷曲。犀樽酒晉玉壺春。
齊眉儷德恩逾重。仙眷同心愛越真。三七韶華香正遠。雲樓稿畫並頭人。

青溪

數到青溪第幾家。蓬門深鎖女兒花。雙輝秋水流明月。一笑梨渦泛彩霞。
回首綠隼墜馬髻。折枝紅粲守宮砂。由來國色遭天忌。鎮日江邊祇浣紗。

秋日病起謝友

萬籟無聲夜氣清。呻吟床第望天明。秋空過雁池塘靜。初日移花簾幙橫。
畢竟西林能續命。居然獨木足扶傾。雲情合啄金環報。展轉尋思到五更。

簡外次勻

山樓歸去夜淒清。熊夢蘭徵總莫明。霜落華巔增客感。露從秋白半江橫。
卅年作繭心同悴。小別回眸淚又傾。料是孤檠眠不穩。寒宵細細數長更。

次小蝶勻柬龍龕

聞食無魚出有車。東城常日問奇書。瓣香似入南豐室。沒水曾窺領下珠。
德必有隣寧落莫。蘋因風合果何如。秋深蝶影花邊少。豈等吟春集鑑湖。

九江道中

外湖水色北城花。酒賦琴歌事事差。昨夜潯陽江上過。不聞商婦訴琵琶。沙河渡口競追攀。徧野哀鴻淚自潛。不寫山容寫人面。秋風秋雨過廬山。

題枕琴障扇美人圖

花顏雲鬢雪聰明。一種嬌憨畫不成。應是芳心憎素伴。故遮紈扇避人行。

題山水賀楊清熙博士

一松偃蓋二松高。天半噴銀激怒濤。喜聽兒童歌衆母。如君才稱女中豪。

眞武道上遇雨

曲曲盤盤上。雲深路易迷。但聽樹葉響。不覺雨沾衣。

第一峯

紫霄倒挂碧芙蓉。正是青城第一峯。百丈摩崖猶有字。再攀高處白雲封。

漢 杏

古幹穠陰覆講臺。道人指說漢時栽。月明風細花開候。想見驂鸞天女來。

唐 竹

不許凡禽借一枝。吹簫唯引鳳來儀。憑誰闕盡滄桑眼。不見明皇入蜀時。

清吟閣

吟過茶靡步玉墀。層台鐘鼓奏青祠。獨來飛閣憑欄坐。一杵魚更入耳時。

返 棹

尋仙真個到仙鄉。拆坎填離進道場。只怪儂家慳道氣。菜根上口不能香。

長壽橋

橋上婆婆細柳眠。飄然策杖聽飛泉。山容宛是春閨女。側面窺來態聿妍。

思 親

浣花溪似浣沙溪。開到荼靡杜宇啼。瞻望白雲親舍在。何時陪話竹林西。

下山

聽說遊山笑口開。攀援直上妙高台。六齡稚子癡於我。也到峩眉絕頂來。

龍門洞

列屏聳翠接諸天。此日登臨笑拍肩。流出龍門趨碧海。此心終似在山泉。

蓮花石

焚香憑几讀南華。義理闡微燦曉霞。手寫金剛三百偈。今朝來證妙蓮花。

題畫

書舍重開流水邊。一叢野樹碧涵煙。眼前活潑天機朗。容我鋤雲抱月眠。

新春

細草新廻綠滿園。春風先得到江邨。日長不放湘簾去。坐對梅花酒一尊。

枕上錫簫隔岸聞。茜牕花影喜新晴。披衣先下瓊樓看。雨後春苗長幾分。
輕寒薄暖釀花天。新漲清溪試畫船。柳岸小桃纔一樹。停橈坐看板橋邊。
小舸清溪憶若邪。隔年猶是未還家。天涯涕淚音書斷。淒絕亭前姊妹花。

卜居

遊徧巴江又錦江。縱情多在木蘭艫。辭家萬里風雲際。燕子飛來總一雙。
卜居猶得錦城東。橋號天仙自不同。數到簾櫳三十二。五雲樓閣對張融。
繡戶珠簾一桁齊。綺窓都嵌碧玻璃。繁花細路將迴處。雙穗吟樓在水西。
門環曲水淨無塵。洪度風流恰比隣。怪煞畫船樓外過。嬌鶯憨燕苦撩人。
枇杷門巷可憐宵。千載吟魂有客招。最愛月明修竹裏。一船容與聽吹簫。

夢回

輕風扶夢到蒼溪。不住黃鶯枝上啼。飛絮滿窓花滿地。羈愁那遣夕陽西。

春光

春光二月正繁華。蝴蝶雙雙掠鬢斜。靜鎖園門無個事。窗前閒煞碧桃花。
一團嫩綠醉春光。宿酒醒時興未央。認得去年雙燕子。又銜花片上雕梁。

柬友

柳岸花明一望齊。勸君打槳出前溪。遠山疑與諸天接。踏到高峯轉覺低。

閒情

偶然調寄望江南。日日江樓坐翠藍。可惜酒懷消未盡。來生倘作吐絲蠶。

晚涼

閒坐園林愛晚風。靜看翡翠浴池中。唼唼啣得魚苗去。飛上高樓第幾重。

題畫

一桁穠陰入翠微。臨流徒羨鱖魚肥。東風遠送桃花浪。錯認羣山盡欲飛。

戲反外子詩意

蕭蕭門徑滿蒼苔。流水灣環不著埃。此老胸衿特奇絕。荆關重阻俗人來。

題畫

最難點染美人湖。雲影波光有若無。翠竹千竿樓一角。贈君好作隱居圖。

寄外

青天碧海夜迢迢。夢到離人第幾宵。十幅香簾春不卷。密緘心字寄江皋。
華灯絮語綺窓前。珍重庚程路五千。記得遠行裝束了。羅衾添換一重棉。
相思屈指未爲遙。九曲腸迴子午潮。若到相逢說相憶。自從去日到今朝。

題談月色墨梅

十年春夢憶羅浮。把酒披衿認舊游。誰道閨才宜暗斂。此圖合供望春樓。

松坎

孤館溪流入耳清。夜窗虛對玉蟾明。者番勾起無窮事。猶是巢居灌口情。

釣絲巖

斷崖削峪臨無地。仄徑撩雲過急灣。謀國敢將衰朽惜。斜風落日釣絲巖。

遵義

萬山盤出見樓台。民物豐熙景象開。可惜劉郎無眼福。不曾身到播州來。

誇宅東劉大

桐高自有鳳凰棲。水複山重路易迷。曲徑側通陶令宅。前門却在特園西。
小小園林亦足誇。綠紗牕對玉蘭花。日斜佳客時相過。排坐迴廊細品茶。
護花四角砌雕闌。軟草芊芊共合歡。只訝東南墻缺點。荷鋤移補竹三竿。
一灣細路夾冬青。書帶沿階綠滿庭。靜覺日長無箇事。海紅花底讀騷經。

靈巖

上方樓殿立崔巍。山勢盤陀一徑開。正苦閒情吟不得。隔牆紅葉送詩來。

山居

窗對花開紅可憐。一稜頑石恰平肩。山居長日無它事。喜逐漁竿向水邊。
寂寞荒村四五家。殷勤欸客點香茶。農餘盡室淘金去。篩徧青城峽底沙。
盤陀鳥道貫叢林。耳畔松濤澗底琴。隨意行來隨意止。白雲猶未是無心。

門前曉望

夾隄秋樹滿江烟。閒煞沙鷗兩岸邊。極目一丸寒翠裏。移來卻是釣魚船。

賀范英莪

名花開到十分春。紅葉題詩信有因。不待東風水上語。天緣付與素心人。
鳳脰高燒肆管弦。天風吹出並頭蓮。梅花瑞雪香成海。一曲霓裳詠列仙。
春色氤氳滿畫堂。紅閨新試壽陽妝。青萍結綠天香水。坐聽簫聲引鳳凰。

東鯨掀浪海揚塵。何處桃源錦水濱。喜見紅梅肥結子。明年定抱玉麒麟。

嬉春

簾櫳日影過三甌。軟綠嫣紅著意憐。開到海棠蝴蝶醉。終朝顛倒在花邊。
一片鶯聲萬柳條。浣花溪上馬蹄嬌。阿誰會得游魚樂。又逐殘紅過小橋。

卽事

錦江新漲碧連天。多少漁簑喜逐鮮。一片喧聲來水上。得魚爭折柳條穿。
喜聽都江說放潮。宵來春水漲三篙。怪他曳杖凌晨去。又挈清樽上小舫。
門外膠舟鎮一冬。隔江孤負翠雲峯。而今重理新詩卷。長倚靈巖坐古松。
陌路邨姑手一籃。攀桑采葉餉春蠶。笑儂歷碌双蓬鬢。底任蓬鬆不上參。
十里東郊三瓦窰。勞徠范土趁江潮。柔條夾岸濃陰裏。人語輕舟過板橋。

哭蕭烈婦

嫁得蕭郎萬里游。鹿車同挽錦江頭。無端一夜罡風起。玉碎香消滿地愁。
良人衛國妾殉郎。共命鴛鴦日月光。爲絕愛緣心獨苦。尊前不惜語荒唐。
夫壻成仁婦職終。遺孤無奈累衰翁。靈前飲彈從容去。笑向泉台事鬼雄。
青天碧海位精英。飛將魂歸細柳營。一事難銷家國恨。要撐雙眼看功成。

早興寄外

鷄鳴又是五更天。起視兒曹尙熟眠。此際孤吟無限思。離愁寫上浣花箋。

題春愁圖

纔結同心別夢頻。五銖衣薄怯風輕。恩情未抵功名重。何事檀郎不惜春。
紅闌無計遣春愁。嫁得江郎賦遠遊。兀坐支頤陟遐想。東風送我上西州。
寄語封侯事可眞。侯封那得及青春。種瓜亦有封侯者。端爲封侯誤箇人。
舊事如雲子細溫。馬蹄聲近早開門。塵衿不拭忙携手。一度思量一斷魂。

寄懷蕭稚秋夫人

庭階寂寂意繇繇。絡緯秋聲小可憐。記得倚闌同立月。而今又見十分圓。

寄外

別來塵俗儘相乘。烽火西南百感興。料得旅懷拋不得。夜深同是坐孤鐙。

劇情

隔座同心暗送鉤。嬉春偕上十三樓。霓裳一曲鈞天樂。誰識人間有莫愁。
喜傳賦筆進長楊。誓海盟山豈渺茫。風過茶靡香欲醉。一双倩影話朝陽。
幾輩如君福慧全。畫眉綵筆帶雲烟。裴樊仙眷人爭羨。小劫紅塵五百年。

題松月圖

喬松千歲費吟安。添上溶溶月一丸。想見淋漓大筆寫。蒼龍擎出水晶盤。

調靜貞夫人

梅子含酸蜜又甜。紅閨選飯各微嫌。靈心獨愛郎詩俊。信手拈來五味兼。

題雲漢吟窩

眷屬神仙隸上清。陶園池館報新成。定知花底閒情賦。直使檀郎困管城。四面窗開護綠蕉。玉人斑管思如潮。書成倚檻遲郎讀。一髮江山送六朝。

蜀雲正寫時事評論

一園翠竹一池烟。賺得郎來立並肩。倩影相將春水炤。鴛鴦移入並頭蓮。前度陶園三月居。屏山鏡水炤吾廬。東風吹上蓉江路。秋月春花總念渠。

題雲漢吟稿

高格清新思出漢。多情哀怨氣凌雲。不同凡響推徐淑。合有天才儷左芬。

次蜀雲失眠句

坐盡秋宵夢未成。苦吟端合以詩鳴。相隣惟有樓頭月。炤徹閨愁到六更。

聞鵲

風雨江南客未歸。鄉心愁對子規啼。奈何天總留遺憾。不放蓬瀛頂上飛。

次元芳述夢句

展讀新詩雙眼明。蘭因絮果記三生。祇愁黛蕊重開日。萼綠華來不世情。
翡翠簾櫳蝶夢知。哦詩印證亦相宜。紅闈定有燈前願。莫再來生作女兒。
不愁傾國與傾城。但願紅闈海樣情。生恐癡心迷隔世。鐙前刻骨記香名。
可惜與君慳一面。卽從此際訂詩盟。西山相距無多路。儻告華鬢夢裡情。

題畫留別

隄柳初花錦水明。杜鵑啼徹不勝情。客中相送愁何限。一片東風唱渭城。

題柳規友

陌上依依別意長。一生青眼爲春忙。隣渠作絮行飄蕩。猶自迴風舞夕陽。

卽事

江上結茆人意遠。枕邊拂曉鳥聲多。請將此景翻新拍。付與船娘唱權詞。

寄外

客裡憐君雪滿頭。燈前猶是發詩愁。萬篇儘够教兒讀。何苦貪多不厭收。暫閣吟情且算曠。雖非無補費精神。在君斗酒詩無數。一字能安總苦人。清標未必爲吟詩。月露霜風豈是宜。垂老心身須愛惜。頻伽共命可無辭。且將筆研付江湖。漫向尊前怨夜遙。攜手闌干溫舊夢。月明樓上一枝簫。

工部祠

當年雅愛杜陵詩。今日瞻依工部祠。烽燧滿天家萬里。艱難尤甚結茆時。

閒情

引得清溪入短牆。流經花底有餘香。斷紅閣荇無窮艷。錯認秋階發海棠。

題蕉底美人

笑鬢愁蛾絕世姿。病來那禁晚風吹。芳心早共蕉心卷。獨立斜陽欲步遲。

贈別

樓頭別語太淒清。寂寞闌干流水聲。數到月圓文酒夜。迢迢相望有同情。

送縵麗夫人東歸

風雨淒淒送客心。隔宵清話少知音。山居寂寞誰爲伴。止是灘前一水禽。

贈枕琴室主

琴棋書畫總超群。金石奇才邁等倫。閨苑春融仙子宴。一齊拜倒石榴裙。
十日平原結勝緣。雙星重炤又何年。當筵乞得生花筆。爲賦江淹別恨篇。

次外詠四老句

一臥烟波遠是非。清晨放棹夕陽歸。生涯不問魚多少。老愛江山任鳥飛。

脚健無妨世路偏。臨崖何礙息双肩。持危要賴心頭穩。斬盡榛荆樂晚年。
耨雨鋤雲每戴星。誅茅務盡重丁寧。兒孫耕讀傳家法。牛背舒徐好讀經。
丈夫要位千秋業。豈爲科名始乞靈。且事立言垂不朽。勝它枯死案頭黃。

閒吟

日長風暖意舒徐。細嚼新詩味有餘。庭院清幽人一箇。海紅簾底坐攤書。
吟出閒情寫自看。祇爲一字未曾安。行行踏徧花間路。信是三軍得將難。
新茁蒲薺勝雪梨。自將外紫手輕批。晶缸更入糖霜和。不惜功夫擣作泥。
榆錢和粉味清新。山藥抽絲亦可人。我自荒居生意足。寧須更選八廚珍。
誰言口味隨人性。我道烹調在得宜。格物先規文武火。醫人醫國豈殊斯。

卽景

山鳥呼風山雨霏。行雲片片漏意微。愛憑小榭煙波裡。遲我江南六載歸。

綠搖平野興隨飛。紅透桃花意漸微。新漲江頭魚正美。一竿垂暮坐忘歸。
題錦江密月圖

柳岸霏烟綠滿湖。蓬山樓閣浸冰壺。世人羨煞神仙眷。來畫春江密月圖。

題畫

高樓新敞錦江邊。日暖香飄並蒂蓮。梁案風清人似畫。幽居端不讓神仙。

題巴山話雨圖

巴山夜雨坐冥濛。高詠清寒畢宿通。兩箇詩人圖畫裡。尊前白髮蠟燈紅。
一片蒼茫摩詰畫。烟巒祇在有無中。跳珠穿檻侵衣濕。應羨披簑坐釣翁。
儘是愁多酒莫辭。丹楓炤眼助吟詩。平蕪斷岸誰家笛。吹起江山暮雨時。
江南此景年時有。六載依稀認舊游。擲筆不禁天末感。瀟瀟風雨問歸舟。

題澄懷閣梅花百詠集

吟出梅詩句句佳。百篇如意寫澄懷。而今臥雪香如海。無復尋春到水涯。

次韋秘書句

常讀新詩勝比隣。行間吐露性情真。懷人寄遠多奇句。想見胸衿不著塵。
六載燈前歸夢悠。讀書而外更何求。羨他多少東歸去。柳岸簫聲送客舟。
老來眉樣失時宜。來日艱難況客時。祇合苦吟同此際。蘇州人唱韋家詩。
與君同有拋家感。一段雲遮錦水涯。記得故園風景好。香車四面卷窗紗。

贈稚秋夫人

道韞才名海內空。一鞭又指大江東。石橋留得裴樊住。片語能生四座風。
海上吟樓號稚秋。千鈞筆力喜無儔。中原碑本搜羅盡。萬里尋詩到十洲。

次 句

銅鑪灰燼尙香霏。靜覺詩心漸向微。人似浮萍風聚散。天涯何處是當歸。

寄懷雲漢樓西川

夜來別館話元旌。早起狂風雨滿天。轉念行空賢伉儷。今宵能否到西川。
萬里止消半日程。飛經港桂可曾停。連朝愁雨愁風急。一路平安祝福星。
久別東來碧漢雲。最先良晤范希文。華鐙盛宴歡何極。到處春風祇羨君。
爲策安危速我來。居停三月樂銜杯。不圖風雨橫江際。客路蒼茫送子回。

公園

高樹風多響晚清。綠茵如繡會傾城。花邊儘是雙鸚鵡。莫漫驚猜濮上行。
亭路逶迤接小橋。蓮開紅白競妖嬈。玲瓏樹底盤陀石。閱盡三生茁愛苗。

補遺

得寶行 詠川俗

王佩芸巽宜

錦江秋水碧如油。拂岸垂楊影畫樓。相約吹簫王子敬。雲光靨靨好同游。
待濟無舟迴古渡。行吟踏徧沿江路。枇杷巷口客如潮。驀聽鶯聲呼止步。
笑靨愁蛾委曲陳。證明絮果與蘭因。天涯幸值嬌兒父。請念依依膝下人。
回首呼兒前拜見。笙管敖曹歎盛譙。此時那辨夢耶真。酒未沾唇心早醉。
亟請當筵爲命名。義從仙李繼長庚。此兒貴壽應無極。平步從容到上卿。
錫類推仁嫌未够。再拜尊前乞金扣。要將金扣鎖飛龍。長使作霖福東亞。
投瓊報李綰紅綃。織得長生帶一條。此物雖微情意遠。好將恩義繫當腰。
一家笑語天倫樂。不覺油然興舐犢。音容笑貌印深深。喬梓相依還不足。

此時妒煞道旁花。手指何修做阿爺。算到中秋佳節近。登堂再看會親家。
我疑傳聞非目睹。難得君來言楚楚。平生亦慣曼倩遊。四十六年未曾有。
合寫新詩慶弄璋。此情且莫報閨房。六年孤負鴛衾冷。未免良人太不良。
詩就爲君歌得寶。奇聞傳徧錦官道。相門出相信有徵。莫把親恩委秋草。

聞邁羣臥病黔靈却寄雲姊

傳說徐陵瘦可憐。西風長簾悵孤眠。乍嘗別恨濃於酒。欲寄相思嬾似棉。
未免有情生客裡。除非無夢隔雲邊。蠻烟瘴雨花糝妹。莫認天台信宿緣。

壽劉倚仁先生五十二月二十七日

萬里人歌錦瑟絃。莫將閑恨感華年。神仙傳爲君家記。勳業圖歸麟閣鏤。
開到梅花剛五秩。斟來椒酒借三天。箕裘奕世皆隆準。合賦新詩佐舞筵。
危局端憑國手醫。犁庭掃穴盡無遺。三年飽看章江月。萬里來吟蜀道詩。

千古風流推白傅。半生遭際似微之。買書防爲閨人誚。可記囊空瓶盡時。
同舟襄漢豈無因。石上三生記可眞。念子孤棲同菊瘦。如君始稱鑄金身。
患黃疸病
偏體流金風欺素月愁生暈。劫歷情天局轉新。從此擁香還御李。城東爐煞

白頭人。

雅奏墳箴有士衡。當年課讀夜三更。文光早貫東瀛月。劍氣開張西晉兵。
掌上明珠無價寶。膝前一鶚萬人英。馬當風利樓船疾。贏得將軍小李名。
青鳥書傳東閣開。水桃介壽帶詩來。黑頭早具千秋業。平步高登上將臺。
輕按紅牙勞素手。莫辭綠醴盡餘杯。抽毫豈待尋常祝。佇看榮光徧九垓。

次外枯樹

漢南回首感凋零。無復蟠空十畝陰。地自當陽餘骨出。神依故土託根深。
繁華頓覺前生夢。搖落能回一寸心。留此虬鉤挂明月。夜闌好待鶴來尋。

往日容華忍再論。一枝棘栗冷津門。將軍老去空陳迹。游客時來認舊痕。
體縱凋傷稊可長。根經斲喪葉何存。女床元是棲鸞地。寧借東皇雨露恩。
經營坏土好扶持。不礙瓊光在一時。漫訝谷幽鶯去早。可知巢覆燕歸遲。
坐來庭院思濃蔭。倚徧闌干憶秀姿。莫歎微生蕭瑟甚。入春容有著花枝。
彌天風雨蟄龍蛇。賸有枵槎對月華。在昔扶蘇春繫馬。止今憔悴夜啼鴉。
調停生意維新土。管領隄封幾故家。他日濟川應作揖。鳴榔聲裏過繩河。

次外子題雙穗樓同心草句

玉臺韻事今稀有。笙磬同音古所難。文筆淋漓空學步。詩心舒卷枉窺鑷。
敲金合作千年響。點鐵能教一字安。慚媿人稱雙穗集。葑菲祇覺不勝寒。

原作

幾人福慧雙修得。兼有閨房知己難。心氣應求頻唱和。篇章斟酌共研

鑽死碁仙着輸君妙。塵海抽身從我安。讀畫一樓詩合集。未妨風雨詠
荒寒。

詠事

紅海翻瀾決鼻官。重城隔雨望平安。虔修佛事將身替。欲見檀郎一面難。
童子何知孃遠去。蘆花且作絮來看。願兒長大爲農婦。免受人情入骨寒。

綠萼梅

竹外寒吹笛裏風。蕉心歛雪自玲瓏。綠珠體態春初透。碧玉年華貌未豐。
直與九疑分晚翠。了無半點鬥殘紅。青衫隱約枝橫處。一段烟波繪影工。

席上贈陳孝先妹倩

風萍遇合豈無因。杯酒招邀古渡津。萬里人懷去國遠。一江水話故鄉親。
鞭搖漠北鳴沙月。槎訪河源巧織神。還喜連宵頻剪燭。巴山風雨結芳隣。

贈雲姊

蜀中山水數峨眉。塵海論交子最奇。和藹接人春有脚。笑談對客坐忘歸。還開風氣能移俗。屏絕鉛華祇愛詩。幾見築樓薄雲漢。双聲吟到五更時。

陶園感悼倚仁先生

六年前到正花時。窗下飛觴賦竹枝。斗酒聽鶯亭樹外。囊詩歸馬夕陽遲。英雄一代隨秋草。文采千家繫夢思。怕過蕭蕭池上路。此情惟有野鷗知。

奉酬靜貞夫人

青雀西飛憶洞仙。別情長落碧池邊。當時聯詠香蓮國。此日重逢野菊天。夜雨對床溫舊夢。繁霜侵鬢感流年。亂離難得他鄉聚。三宿清談信有緣。

賀李夫人添丁

秋風待度玉河槎。閒步金隄萬柳斜。執手乍驚親串語。如君纔稱小郎爺。

香分九苑承仙種。籙進長生永歲華。祖德從今傳柱史。錫齡應有棗如瓜。

東劉夫人

劉樊元是舊仙真。小謫紅塵皖水濱。亂裡未妨和唱樂。老來無改洞房春。同心儷德支凶歲。裙布荆釵自可人。佇看王師完版籍。買舟東下結芳隣。

懷澄懷閣主人

垂帷人說子雲居。十六年來此著書。室繞芝蘭香正遠。日親詩賦樂三餘。功名那識春官重。世事故應過眼虛。知否有人還劍外。臨風嚮北感何如。

酬外次均

溫言遠寄太綢繆。撩動閒愁索句酬。作賦最憐山月小。此行寧爲稻梁謀。摩天黃鶴渺何許。動地哀鴻望欲秋。一展濟川才不遠。天涯乍聽喜忘憂。

壽外五十

少小同窓識士衡。心兵筆陣自縱橫。丁年便廢詩書業。結客常聞車馬聲。
白眼遭來明世態。黃金揮盡見交情。十年一覺揚州夢。携策長安始立名。
劫後中原歲大荒。哀鴻遍野費周章。華洋義聞推生佛。今古良謨指范莊。
治水南淮開竹港。銷兵東海炳旂常。十年心悴黃河事。一卷書成兩鬢霜。
蕭蕭風雨客京華。琴鶴元來共一車。桃李春風歸馬帳。珊瑚鐵網匯龍沙。
經營俄歛基金定。作育英才令譽加。記得頤和園裏句。人人傳寫碧籠紗。
一杯在手樂陶陶。不是詩豪亦酒豪。官頌久尊萬家佛。樂章細解八瑯瑳。
胸中邱壑憑空寫。夢裏池塘記得牢。書法道州未神似。頻年折盡兔狼毫。
也會仙佛契同參。止觀談玄事事諳。只爲詩情濃似酒。竟教淨業嫩於蠶。
階前雙鳳雲程遠。膝下嬌姝姊妹三。每值退休更漏永。九華燈下看分柑。
一曲笙歌佐綺筵。稱觴兒女舞翩翩。詩人慣祝他人壽。處女爭如嫁女妍。

海上三山歸隱日。尊前五秩數華年。中天景運興名世。佇看榮光滿八埏。
卽事

田齋野菜皆滋味。擣橘爲羹三字全。堪笑世人緣底事。不知眞賞競肥鮮。
贈范英莪

同學京華記可眞。十年廻首認前塵。杏花晴日西園路。七字吟來最有神。
聽雨喜作

隔桁樓台覆綠英。流雲片片過窗明。憑欄午寂擁書坐。喜聽風簷曳玉聲。
萬方多難民艱食。斗米萬千無處尋。正好四山送雨至。田塍點滴勝黃金。
次外退值韻

早趨西角晚東張。拾級攀登道路長。宿閣香鑪舊制好。連山明月衍龜藏。
次啖果

五月西州荔子紅。未能飽啖腋生風。十年空憶西禪妙。香味容光總不同。

次午睡

亭午驕陽少客來。拋書隱几夢方回。餘醒未解高軒過。只道前山起蟄雷。

悼淑君夫人次韻

自送征騏賦小戎。吟身坐困戰塵中。仰天引酒情何限。窈窕明星井絡東。
師行聽說次安居。草檄花前意卷舒。西北樓高人似玉。尋春常日共三餘。
一見同心憐愛生。防人猜意避晴明。託身有意羞難語。故指青松挂女貞。
蜜月雙棲錦水城。玉臺韻事寫閒情。靈心七孔玲瓏藕。兼爲芳隣雪不平。
妙論風生聽也驚。權衡利害洞人情。得君片語紛隨息。無怪脂車到處迎。
樓名推仔樂何如。羨煞張融對戶居。每到月明琴韻裡。衣襟露透聽忘歸。
豈關噩夢病侵懷。鬼如閨才人事乖。喜聽梅開春訊近。可憐瘦骨已如柴。

東風上五竟遊仙。六載恩情一旦捐。今世匆匆緣會了。還期比翼再生天。
棟子風摧綺柱絃。鈿釵何日寄飛仙。簾櫳依舊遺香在。愁煞空齋對月眠。
長簾空床恨未休。三山何處好同游。石榴花發紅於火。只益相思不解愁。
脂盞香銷憶舊情。茜窗無復倚新聲。人生修短終成幻。世界空虛却是眞。
莫道夜臺難瞑目。闡揚四德世人知。彩雲易散玻璃脆。忍讀王郎廿四詩。

題雙紅樓詩詞集

十閱清新絕妙詞。百章風雅性靈詩。尊前曼度雙紅句。政是倚樓橫笛時。

題雙紅樓玉照

海水天風路萬千。刀環馬策送流年。幾家燈火重樓裏。玉案同心便是仙。
一門聚順氣煦春。吟出雙紅字字新。我亦結隣鯤島上。何妨添箇畫中人。

110水

(表 誤 勘)

110	90	90	85	58	51	46	42	25	10	頁
6	6	3	5	2	11	7	10	8	7	行
13	19	8	9	18	16	16	15	15	9	字
賞	挑	狐	聞	推	撫	力	墨	立	看	誤
寶	挑	狐	同	推	撫	刀	壘	玄	天	正
202	197	190	190	188	178	176	174	164	121	頁
9	3	11	3	5	1	6	4	6	10	行
26	27	13	28	6	3	14	8	9	10	字
嫩	爐	意	黃	算	錫	祠	第	沿	梅	誤
嫩	愁	熹	螢	莫	錫	詞	茶	沼	桃	正

9245330

